

東
華
續
錄

光緒一百二十二

臣朱壽朋敬編

臣章圭璋恭校

九月甲戌諭朕欽奉 慈禧端佑康頤昭豫莊誠壽恭欽獻崇熙皇太后懿旨本日召見恭親王奕訢見王病體雖未痊愈精神尚未見衰著管理總理各國事務衙門事務並派派總理海軍事務會同辦理軍務○諭朕欽奉 慈禧端佑康頤昭豫莊誠壽恭欽獻崇熙皇太后懿旨恭親王奕訢著在內廷行走○諭軍機大臣等現在北洋各船修理需時各海口防務十分緊急著暫調南瑞開濟寶泰三船迅速北來助剿務須連檣前進不可離遠免被敵船截擊劉坤一卽遵諭行○李鴻章電致總理各國事務衙門營口道善聯電邊氛漸緊擬募陸勇馬步三營必不可少月餉約九千金就地勸商集捐計可五萬但按月分繳每年仍須官款添募應用鎗礮火藥設法購運所用共約需十萬金查本關洋稅六成項下歷任逐年按結除將整數解充奉餉外尚有底零計共九十四結積餘二十一萬兩可否卽覈此款先提十萬以爲嚴辦軍火添補月餉一切零星製備之用下餘十一萬兩並懇全數留備不虞庶可久支等情鴻章營口防務緊要酌提本關積存稅項爲募練防軍之用似屬可行應請 旨敕部准撥乞轉奏 上諭軍機

大臣等李鴻章電請添募陸勇請提洋稅積餘銀兩爲置辦軍火等項之需等語現在營口防務緊要
著准其在該關積存稅項內提銀十萬兩應用戶部知道○乙亥諭朕欽奉 慈禧端佑康頤昭豫莊誠
壽恭欽獻崇熙皇太后懿旨恭親王奕訢病體尚未痊愈步履未能如常加恩免其常川入直遇有應奏
事件呈遞膳牌一切祭祀差使毋庸開列昨派內廷行走著兌其隨扈以示體恤○諭前經降旨派朱慶
幫辦北洋軍務現在已赴奉天除依克唐阿一軍外所有北洋派赴朝鮮各軍及奉省派往東邊防剿各
營均著歸朱慶幫制如有不遵調遣著著卽以軍法從事不得稍涉徇縱致誤戎機○丙子諭前據御史
安維麟奏參安徽候補道蕭允文貪緣愧溺使餉局缺款挾妓冶遊並試用道許景壽爲之爪牙著鳳翔道
時勒索陋規各情事當經諭令德壽確查具奏茲據查明覆奏蕭允文被參各款或出自傳言或事無左
證惟該員以監司大員委辦要差宜如何小心謹慎乃在上海逗遛游蕩實屬不知檢束有玷官箴蕭允
文著卽行革職其所領辦公銀兩卽著嚴飭核銷毋被侵蝕試用道許景壽雖無爲蕭允文爪牙確據惟
舉動乖方操守難信不勝監司之任著降爲同知歸部銓選餘著照所議辦理該部知道○戊寅召王文
韶入覲以譚鈞培署雲貴總督○諭軍機大臣等本日降旨令王文韶來京陛見著迅速起程抵武昌先
行電奏○諭軍機大臣等著曹克忠招募津勇數營在山海關一帶扼紮程之偉督率馬步二千人應駐

何處著李鴻章妥籌覆奏○調黃少春爲長江水師提督○己卯諭軍機大臣等有人奏南糧商販抵津原有轉運公所代爲存儲隨時發賣年來天津奸商串通衙署丁役把持阻撓抑勒賠累以致南商裹足糧價日昂請飭嚴禁究辦等語著李鴻章卽行查明如有前項情弊務飭嚴行究辦以清奸竊而裕民食○諭軍機大臣等昨降旨命王文韶來京陛見雲貴總督令譚鈞培暫行兼護并電諭王文韶迅速起程將起程日期先行電聞○庚辰諭軍機大臣等前益澤巡撫劉銘傳取軍有法卓著勳勞六月間因日人肇衅特旨起用旋據電覆因疾未能赴召現在軍事日棘統帥乏人該前撫受國厚恩當此邊防危急之時豈得置身事外著李鴻章再行傳諭劉傳銘於接奉此旨後卽行啟程來京陛見該前撫忠勇素著原不致藉詞諉卸視國事如秦越也仍將遵旨啟行日期先行電聞○命兵部左侍郎王文錦前往天津會同在籍提督曹克忠布政使張夢元總兵鄧啟元辦理團練事宜○命編修黃鐸馳赴依克唐阿軍營聽候差遣○以程之偉爲福建陸路提督劉光才爲山西大同鎮總兵○賞給五城煮賑米石○辛巳命理藩院員外郎李顯主事恩惠馳赴依克唐阿軍營聽候差委○壬午命候選員外郎程建勳馳赴北洋交李鴻章差遣委用○賞給通州王恕圖煮賑米石○李鴻章奏據海軍提督丁汝昌呈稱海軍各兵艦奉調護送招商局輪船裝運總兵劉盛休銘軍八營陸兵赴大東溝登岸於八月十七日丑刻由大連灣開

行午後抵大東溝卽派鎮中鎮兩船魚雷四艇護送入口平遠廣丙兩船在口外下碇定遠鎮遠致遠靖遠經遠來遠濟遠廣甲超勇揚威十船距口外十二海里下碇十八日午初遙見西內有煙東來知是倭船卽令十船起碇迎剿我軍以夾縫雁行陣向前急駛倭人以十二艦魚雷猛撲相距漸近我軍開礮轟擊敵隊忽分忽合船快礮快子彈紛集我軍整隊迎敵左一雷艇亦到各船循環攻擊堅忍相持至未正二刻平遠廣丙二船福龍雷艇續至定遠猛發右礮攻倭大隊各船又發左礮攻倭尾隊三船中其扶桑艦三船卽時離陣旋即回隊圍繞我軍夾擊包抄開花子彈如雨一排所發卽有百餘子之多各船均以船頭抵禦翼以大礮得力敵忽以魚雷快船直攻定遠尙未駛到致遠開足機輪駛出定遠之前卽將來船攻沈倭船以魚雷轟擊致遠旋亦沈沒管帶鄧世昌大副陳金揆同時落水經遠先隨致遠駛出管帶林永升奮勇督戰夾中敵彈腦裂陣亡濟遠先被敵船截在陣外及見致遠沈沒首先駛逃廣甲繼退經遠因管帶既亡船又失火亦同退駛倭始以四船尾追濟遠廣甲因相距過遙折回乃衆圍經遠先以魚雷繼以敵彈拒戰良久遂被擊沈超勇船內中彈火起旋即焚沒揚威船內亦被彈炸又爲濟遠當腰觸裂駛至淺水而沈該兩船管帶黃建勳林昭中隨船焚溺同列來遠靖遠苦戰多時來遠船內中彈過多延燒房艙數十間靖遠水綫爲彈所傷進水甚多均卽暫駛離隊撲救修補平遠廣丙及福龍雷艇尾

追裝兵倭船爲敵所斷未及歸隊此時僅餘定鎮兩艦與倭各艦相搏歷一時許巨礮均經受傷定鎮祇有三礮鎮遠祇有兩礮尙能施放丁汝昌督同各將弁誓死抵禦不稍退避敵彈數集每船致傷千餘處火焚數次一面救火一面抵敵丁汝昌旋受重傷總兵劉步蟾代爲督戰指揮進退時刻變換敵礮不能取準又發礮傷其松島督船並合擊傷其左側一船白烟冒起數丈站遠來連修竣歸隊不連廣內和出各艇亦俱折回倭船多受重傷復見諸船並集當卽向西南一帶飛駛遁去我軍尾追數里敵船行賊極速瞬息已遠然後收隊駛回旅順瀕遠一船已先回旅廣甲一船在三山島擱礁拖救不起該兩船管帶方伯謙吳敬榮業經電請分別從嚴參辦所有致遠經遠超勇揚威四船管帶鄧世昌力戰陣亡應從優議卹請奏前來臣查大東溝一戰我以十船當倭十二艦倭艦雖不及定鎮兩艘艦之精堅而船快礮快實倍於我我軍奮力迎擊血戰逾三時之久爲地球各國海戰向來罕有之事各將士效死用命愈戰愈奮始終不懈實屬勇敢可嘉此次據中外各將弁目擊攻沈倭船三艘而采諸各國傳聞則被傷後沈者尙不止此數內有一船係裝馬步兵千餘將由大孤山登岸襲我陸軍後路竟令全軍俱獲而我運送銘軍八營駛抵口內得以乘間陸續起岸不至被其截奪關繫大局匪細實賴海戰保全之功若非濟遠廣甲相繼遁逃率亂船隊必可大獲全勝猶幸致遠經遠衝鋒於前定鎮鎮遠苦戰於後故能以寡擊衆轉

敗爲功此則方伯謙之罪固不容誅而鄧世昌劉步蟾等之功亦不可沒者也提督丁汝昌統率全軍身當前敵受創後猶復興疾往來未嘗少休激勵將士同心効命當時交戰情形雖經臣電致總理各國事務衙門先後奏聞在案八月二十九日欽奉電 旨東溝之戰倭船傷重鎮遠定遠各將士苦戰出力著李鴻章酌保數員以作士氣等因欽此當經恭錄轉行欽遵查照容俟查明核實奏保其力戰陣亡之管帶大副等自應先行奏請 恩卹以慰忠魂致遠管帶提督銜記名總兵候補中軍中營副將鳴爾薩巴圖魯鄧世昌經遠管帶升用總兵左翼左營副將穆欽巴圖魯林永升致遠大副升用游擊中軍中營都司陳金揆爭先猛進死事最烈擬請 旨將鄧世昌林永升照提督例陳金揆照總兵例交部從優議卹鄧世昌首先衝陣攻毀敵船被瀕後遇救出水自以閩船俱沒義不獨生仍復奮擲自沈忠勇性成一時稱厥殊功奇烈尤與尋常死事不同且官階較大可否 特旨予諡以示優異而勸將來出自逾格 恩施非臣所敢擅擬超勇管帶副將銜左翼左營參將黃建勳揚威管帶副將銜右翼右營參將林履中力戰捐軀同堪憫惻擬請 旨各照原官升銜交部從優議卹其餘陣亡傷亡受傷員弁應俟查明奏請分別照章卹賞又奏記名提督廣東高州鎮總兵左寶貴在平壤力戰陣亡經臣奏明蒙 恩賜卹後蒙諭旨飭查該總兵子嗣幾人候 旨施恩仰見 聖朝褒忠延世有加無已之 隆施凡在戎行同深感

番查該故鎮籍隸山東費縣起家行伍轉戰南北疊著戰功自調防奉天統領馬步各營駐頓地方剿辦盜匪殲績卓著爲東防諸將之冠其弟左寶賢左寶清先後在直隸鄭家口奉天法庫門等處剿賊陣亡今該故鎮復以血戰捐軀同產三人俱死王事一門忠義實堪敬憫該故鎮現有親子三人長左國楫年八歲次左國棟年七歲次左國樟年六歲均無官職將來及歲時應如何 加恩錄用之處伏候 聖裁上諭前據李鴻章電奏海軍各艦在大東溝洋面與倭船接仗情形當經諭令該大臣查明傷亡將士請旨優卹茲據覆奏詳細情形此次海軍護送運船突遇倭船鏖戰三時之久我軍以兵艦十艘當倭船十二艘以寡敵衆循環攻擊始終不懈俾陸軍得以登岸我船被沈四隻擊沉倭船三隻餘船多受重傷各將士効死用命深堪嘉憫提督銜記名總兵鄧世昌升用總兵林永升均著照提督例從優議卹鄧世昌首先衝陣攻燬敵船被沉後遇救出水義不猶生奮擲自沈忠勇性成死事尤烈並著加恩予諡升用遊擊陳金揆著照總兵例從優議卹參將黃建勳林寶忠各照原官升銜從優議卹以慰忠魂餘著照所議辦理該部知道欽此另片奏遵查陣亡總兵左寶賢子嗣覆奏等語左寶賢之子左國楫左國棟左國樟均著俟及歲時帶領引見候旨施恩○癸未諭前據國子監司業瑞洵奏請清查民人習入旗籍以別流品一摺當令八旗都統等確切查明參酌成案奏明辦理茲據奕劻等查明覆奏各旗編籍之例本極

周詳惟恐日久懈生著該都統等分飭各佐領履詢密察均照成案辦理至報冊送考各官銜爵尤宜加
意查核倘有朦混情弊即將該管官立予參處餘依議該衙門知道○召張之洞入覲以譚繼洵署湖廣
總督○張聯桂奏查光緒十五年十一月准會典館咨測繪與圖頒發格式到粵當經前撫臣行司通飭
遵辦因粵省僻處邊隅鮮知測繪之法送到圖說多不合式臣前在藩司任內擬委員延友設局專辦詳
經前撫臣馬丕瑤奏明展限在案並以全省幅輿遼闊按照格式逐一測勘推算若待繪畢一縣再繪一
縣未免引日稽時又於省城及南寧柳州分設三局同時並舉期早竣事茲據報辦理完竣呈繳圖說前
來臣維我朝地輿之學超邁前古測量斗極按切經緯立法至精今泰西諸人尙能談天說地推步精
微矧我國史詎宜從略至於嚴疆海濠尤控馭之所關者其險要宜加詳焉惟是粵地山重水複嶺峻灘
危測繪較他省爲難計里開方又復限於尺幅該委員等友考求成法購覓儀器多方選秀穎之士分途
推測以山川爲標準以城垣立方位正準量以求經緯而鳥道之寬徑無量無縮定分率以辨廣輪而犬
牙之出入可分可合然測量之術若全憑儀器製有良磁斯數有差忒故不如以里數求之今推緯度用
分率法推經度用弧三角法其地面里數用割圓八綫餘絛推算速度漸次增減其重差之仰縮與極度
之斂侈悉皆密合矣凡山川道路關隘塘汛墩舖寨堡村墟皆實測之以繩繩測方向以全圓儀測交點

以象限儀測高低以代弓繩測丈尺一一周履復勘期無累奏之訛歷年餘而草圖成又年餘而真圖就
然後照泰頒格式分年縮繪詳考古籍案據撰爲表說計省總圖一經緯圖一府總圖十有一直隸總
圖一直隸州總圖二廳州縣土州縣司散圖八十有三凡例一說十有四表八十有二由司道公同校閱
詳送到臣等加查核圖之計里開方表之條屬件繫均與原頒格式相符邊界卡隘分見散圖而詳其說
於省總圖不另繪立又標識表說稍有變通亦於凡例聲明至徭山之疆域道里名目山洞深淺漢人罕
從出入未便赴山測繪致令驚擾今第於圖內劃以界綫著其大較下所司知之○甲申諭朕欽奉 慈
福端佑康頤昭豫莊誠壽恭欽獻崇熙皇太后懿旨本年十月初十日慶辰典禮皇帝親進表文欽此所
有應行禮節該衙門敬謹預備○丙戌承德奏奴才前於本年四月二十七日承准軍機大臣字寄光緒
二十年四月初七日奉 上諭有人奏劣員盤踞把持公事爲害地方據實糾參一摺據稱三等台吉車
林多爾濟久在庫倫無惡不作經前任辦事大臣嵩昌驅逐回旗乃該員仍敢盤踞庫倫干預公事擾害
地方逼令呼圖克圖違居仙境幾釀命案經四部落蒙古聯名稟報庫倫大臣被其挾制代爲彌縫各蒙
古等不得已遂報烏里雅蘇臺將軍代奏等語所奏是否屬實著承德確切查明據實具奏毋稍徇隱原
摺著鈔給閱看將此諭令知之欽此欽遵寄信前來經奴才已將風聞庫倫哲布尊丹巴呼圖克圖因修

廟宇需用木料等項照依舊次拉運辦理不意竟被三等台吉車林多爾濟獨自持阻以致物議沸騰怨言噴噴並據扎薩克圖汗部落盟長等聯銜呈報各節亦與前情相同當由奴才分飭查明聲覆再行核辦等因奏明旋奉 硃批知道了著卽認真查辦欽此欽遵跪讀之下奴才自應欽遵飭調兩造澈底根究認真查辦惟哲布尊丹巴呼圖克圖係奉 旨晉封大喇嘛 特諭督率衆沙辛喇嘛等常川諷經倘若遽調尤恐衆數見疑滋生枝節嗣據圖什葉圖漢車臣漢三音諾彥各盟長等先後聯銜呈報各情數與扎薩克圖漢部落所報確鑿無異既據四盟盟長王公等咸稱被閒散公銜三等台吉車林多爾濟把持阻滯哲布尊丹巴呼圖克圖拉運修廟木料以致震動衆心怨言噴噴實屬難處尤堪痛恨請由奴才將該台吉從重奏參以示儆戒俾撫衆心等情聯銜呈報前來奴才詳查此案情詞相同除將哲布尊丹巴呼圖克圖修廟自行採運木料等項由奴才徑飭四盟轉飭各旗一體毋得阻止其餘不准假名拉運致擾各該旗其沙辛章楚布與馬台吉車林多爾濟一節檄飭該營尙卓特巴徑行責懲發落外所有台吉爾圖親視師尊有違 諭旨若不從嚴懲辦不足以釋衆怨相應擬將公銜三等台吉車林多爾濟請旨革職交該旗嚴加收管毋得再行滋生事端稍示薄懲以崇黃教而杜刁風得 旨如所請行○丁亥諭軍機大臣等前令李鴻章再行傳諭劉銘傳卽行來京陛見究竟何日啟程現尙未據覆奏仍著李

鴻章傳旨催詢並將啟程日期先行電聞○諭京城地面各國教堂相安已久理應隨時照約保護現值東倭擄奪與西洋各國毫無干涉本年各省來京人數眾多恐無知之徒妄生疑忌更有兇惡棍徒遇事生風希圖乘機滋擾而應預為防範著步軍統領衙門五城御史分飭所屬認真彈壓加意保護倘有不法匪徒藉端滋事立即嚴拿從重懲辦不准稍涉輕縱○以陳學棻署兵部左侍郎○李鴻章電致總理各國事務衙門與使文電阿輪可定行期如英再阻即無法怡和行東克錫云智利兵輪七現決意賣阿廠新造大快輪在內如能辦到日惠早除必省兵費各國現有我賠日兵費了事私議實不忍聽叩克錫屬代寄暗碼電伊已電該行帶書至鈞署面譯其密電云現有頭等快艦七艘可購噸位子藥魚雷員役一切俱全船名列下 卜拉德 白朗古 額斯默拉爾達 額拉粗力士 平度 康德爾 林則以上共七艘請速電與使克日定購此機萬不可再失現在軍情緊急價值多寡無關重輕等語鴻按船名查各國刊行海軍船表內載卜拉德係鋼甲快船大而精堅行十八海里零三白朗古即阿廠去年造成大快船行二十二海里半康德爾林則快船較小皆行二十一海里額斯默拉爾達三船行十八九海里不等各船大小快礮均多若躉買可自成一隊否則卜拉德白朗古康德爾林則四船並購亦足張吾軍日恃船多橫行海面添此船必可制勝惟購價及包送費計必甚鉅可否電飭與使密速妥議再以四

五釐輕息借洋債償之乞代奏請 旨 上諭軍機大臣等李鴻章電奏與照瓊電現有頭等快船七艘可購礮位子藥魚雷員役一切俱全可自成一隊否則四船並購亦足張吾軍海面添此船必可制勝惟購價及包送費必甚鉅等語添船制勝係目前要務惟價值多寡亦應調明必須即日送到方足濟事著卽行電詢與照瓊此項船隻果否堅利適用七船並購共約價值若干若購四隻需價若干能否包送無阻需費若干何時到華迅卽電復再候諭旨辦理○戊子調邵友濂署湖南巡撫以唐景崧署福建臺灣巡撫○以壽耆爲內閣學士○諭軍機大臣等葉志超駐軍平壤漫無布置以致臨敵潰退衛汝貴所統盛軍兵數較多全行潰散鎗械盡失且劣蹟甚多屢被參劾葉志超衛汝貴均著先行撤去統領聽候查辦聶士成向來帶兵尙屬勇往葉志超衛汝貴所部各軍卽著宋慶傳旨派令聶士成統帶以專責成○己丑諭軍機大臣等海軍受傷大船二隻前經電諭星夜加工修理現在該已修好各船何日出巡洋面守護嚴密著李鴻章迅速電復○譚鍾麟奏准戶部咨議覆閩省奏請全免鹽監監稅難行等因卽經飭遵辦去後茲據福建鹽法道龍錫慶會同布政使黃毓恩詳據通省總散商販運安遠等稟免釐之請既奉部駁何敢一再瀆陳惟是商販困憊已極規復萬分爲難不得不就部議指駁各條反覆聲明再三籲請閩省瀕海產私原與淮浙粵東無異然淮浙於兵燹之後正額尙未復舊閩則於正額之外又加釐

金是辦法本已偏枯非免釐難期公允此他省所不能藉口者也裁陋規加釐金名義固正然富有陋規之時每年實收正課不過十餘萬兩是陋規一項係虧正課以應之並非於正課二十八萬之外尚有餘力供此陋規也今則完足正課又加釐金名曰化私爲官實則自無而有商力幾何奚以堪此閭閻不借行於江西誠如部議然當同治之初實因浙岸未復江販廢來故銷數頓增徵收較旺乃據偶爾旺銷之微數定爲永遠照收之釐金三十年來筋力盡矣此相繼請免實有萬不得已者德化滋事雖係樸戶辦理不善苟早免釐金成本既輕樸戶亦何至抑配售價既賤鄉民又何必食私是因私多而抑配因抑配而擾民竟委窮源釐金實階之厲至釐入爲出固有常經酌盈劑虛亦宜通變鹽釐一項當日原奏係充軍餉昔日軍需旁午商等毀家紓難既已竭力於前今則軍務久平商等力盡幫危宜蒙矜卹於後況請免全釐數止八萬餘兩以商等言之固已視爲鉅款以全局計之似尙易於轉旋以上數端在部議所謂窒礙者係理財之常道而商等所難緘默者係實在之情形非敢蹈危詞聳聽之習實迫於窮則呼天之義籲懇詳請永免全釐以紓商困再三籲求情詞極爲懇切該司道查鹽務之根本在乎銷數銷數之旺淡視乎價值非跌價不足敵私非免釐不能減價聞鹽自有釐金以來本重價昂銷數日絀民則困於食貨樂於趨私禁令雖嚴刑章甘蹈私局日衆訟獄繁興民之生機感矣商則課釐並徵迫呼日迫掩前挪

後欠款繁累典借俱窮支持無力商之脂膏竭矣商販積累至數十萬官運借之雖每屆勉報全完實則寅借卯糧彌補無計官之設施窮矣茲察該商販等所稟各節委係實在毫無虛飾況今年五月二十九日起已經限滿三十屆將報啟徵若將此次請免之六成與從前暫免之二成盤金一旦責令規復每年卽須多徵八萬餘兩而時勢至此商力至此委實萬難支持所謂非免盤不能減價非減價不能敵私趁此尙可挽救倘再遷延日久受病愈深卽欲補救已無及矣該司道具有天良斷不敢意存瞻徇而事關全局又未敢隱忍自安故不得已據情詳請照原奏將西路之邵武光澤泰寧建寧建安甌寧建陽崇安南平順昌將樂尤溪永安沙縣古田縣之黃田埕並龍巖漳平寧洋及南路之閩縣侯官羅源甌江閩清等二十三幫奉准暫減之六成並前奉准減之二成鹽盤暨縣澳等幫未經請減之鹽盤一萬九千餘兩再行奏懇 天恩請自三十結起仍准不拘年限一律全免俾得減價敵私疏通銷路以甦商困而保課源等情前來臣覆加查核洵屬實在情形合無仰懇 天恩俯念閩粵商情萬分疲憊立見傾危准將西路邵武等二十三幫及縣澳等幫鹽盤全行調免而資補救得 旨戶部妥議具奏○庚寅祭 歷代帝王廟遣溥靜行禮○辛卯諭軍機大臣等有人奏鐵路開至關東已將關門東偏平爲坦途恐倭以海輪裝兵由牛莊金州等處乘間登陸強劫軍火駕駛應將過關一段鐵路拆卸將關城照舊修復等語山

海關防務緊要自應修守嚴整預杜狡謀著李鴻章按照摺內所陳各節體察情形將如何籌備之處卽行覆奏○齊關奏近值倭氛不靖各省沿海一帶民情惶惶全在地方官彈壓撫綏勿使腹地百姓先自擾亂實爲正本清源之計乃奴才近聞山東登州府棲霞縣知縣陳洵種植狂悖深堪駭異該知縣以捐班分發今年二月得署棲霞到任後不理民事專以苛斂爲能民情已爲之大擾近復設法嚴逼稅契以網羅財利委任倉書戴奎林春生等按社苛派務令每戶皆出稅契之資否則惟地保是問向例由藩司頒發契紙每張交銀一錢該知縣加至四錢復從其契內地價每兩再索銀四分以飽私囊已稅者四千餘戶未稅者每日敲捕追呼鎖禁繫繫幾至激成變亂民不獲已控府申訴府委福山縣知縣康鴻遠會辦既而受其賄囑曾不與百姓申冤乃含混稟覆而去該知縣益復肆行終日差傳鎖押民不聊生爲之大困現當海疆多事之秋非官民聯絡不足以資捍衛乃至陵民肥己悍然與百姓爲仇萬一奸民勾通外洋藉圖報復於海防大局何堪設想相應請 旨飭下山東巡撫李秉衡確切查明迅速懲辦勿使此等劣員貽誤地方則百姓幸甚大局幸甚 上諭軍機大臣等有人奏山東知縣陳洵於本年二月到棲霞署任後專以科斂爲能設法嚴逼稅契委任倉書戴奎林春生等按社科派每張契紙加銀至四錢復從地價每兩索銀四分日事追呼該縣民人赴府控訴經該府委福山縣知縣康鴻遠會辦受賄含混稟

擬請旨飭查等語所奏如果屬實殊爲地方之害著李秉衡確切查明據實覆奏毋稍徇隱原片著鈔給閱看將此諭令知之○前湖廣總督涂宗瀛卒予祭葬○甲午諭軍機大臣等洋員漢納根在北洋當差有年若令統帶師船出洋攻剿是否相宜並應如何重其職任授以實官之處均著李鴻章妥籌具奏○乙未諭軍機大臣等有人奏盛宣懷承辦轉運採買兵米浮冒多至數十萬金天津招商局突被火焚兵米付之一炬難保無侵蝕後希圖掩飾之弊等語著李鴻章確切嚴查據實覆奏○丁酉 上御紫光閣閱馬步箭○諭本年十月初十日恭逢 慈禧端佑康頤昭豫莊誠壽恭欽獻崇熙皇太后六旬萬壽業經欽奉 慈禧慶辰典禮仍在大內舉行所有慶賀及筵宴各事宜經朕簡悉 慈禧十月初十日在皇極殿受賀初五日朕率領王公百官詣皇極殿筵宴朕親進爵初六日皇后率領妃嬪等位公主福晉命婦等詣皇極殿筵宴皇后進爵十二日朕率領近支王公等詣皇極殿筵宴進爵十三日皇后率領妃嬪等位公主福晉命婦等進拜其應行典禮著各該衙門敬謹預備○戊戌諭欽奉 慈禧端佑康頤昭豫莊誠壽恭欽獻崇熙皇太后懿旨此次武殿試二十四日皇帝閱看馬步射二十五日閱看弓刀石均著派御前大臣恭代閱看○諭朕欽奉 慈禧端佑康頤昭豫莊誠壽恭欽獻崇熙皇太后懿旨本科武會試傳臚停止升殿○諭朕欽奉 慈禧端佑康頤昭豫莊誠壽恭欽獻崇熙皇太后懿旨衍聖公孔令貽

著加恩賞戴雙眼花翎○諭王廉奏特參疏防監犯致斃多命之管獄等官請旨分別懲處一摺湖南永定縣監犯李四八李君臣因與同監犯人口角致斃監犯禁卒人等多命並拒傷管獄家丁扯開獄門逃逸旋被追獲該二犯自刎身死該管官疏於防範咎無可辭管獄官永定縣典史鄭家彥著即行革職歸案審辦有獄官署永定縣知縣李尚卿著即撤任聽候查辦餘著照所議辦理該部知道○李鴻章奏海軍各艦於八月十八日在大東溝洋面與倭艦接仗力挫兇鋒當將大略情形電達總理衙門轉奏二十九日欽奉電旨東溝之戰倭船傷重鎮遠定遠各將士苦戰出力著李鴻章酌保數員以作士氣等因欽此仰見聖明俯念微勞有功必錄之至意當即恭錄轉行欽遵查照茲據海軍提督丁汝昌查明核擬呈請具奏前來臣查大東溝一戰我以十艦當倭十二艦倭人船破俱快我軍奮力迎擊血戰逾三時許始則互有損傷既而我船或沈或焚或因傷修補或駛追敵船僅餘定鎮兩鐵艦與倭各艦相持至三點餘鐘之久倭砲四面環攻我軍奮死抵禦卒能以寡敵眾轉敗為功登時擊沈其督船戰船運船三艘因傷後沈者尚不止此數其運船係全裝陸隊將由大孤山登岸內犯竟遭覆沒而我運送銘軍八營得以乘間登岸不致被截保全實多當日苦戰情形臣於九月初七日業經詳細奏陳全船將士同心合力愈戰愈奮始終不懈均屬勇敢可嘉現奉諭旨酌保數員自應按照部定章程不得逾十人之數謹擇

其尤爲出力者分別酌議獎敘又奏據海軍提督丁汝昌呈稱濟遠被乙兩船於六月二十三日在牙山接仗幾將傷亡人數先後呈報定連鎮遠各船於八月十八日在大東溝接仗除被沈焚各船員弁兵勇尙有陸續救回應俟查明實數再行具報外應先將定遠等七艦陣亡受傷各弁勇分別等差酌擬卹賞開單呈請具奏前來臣查海軍交戰與陸路不同一船之間彈雨紛集船中緊要處所尤爲敵礮所聚攻各將士以血肉之軀捨命爭持死事情形最爲慘烈大東溝一役血戰三時之久固爲環球各國所罕聞卽牙山之戰倭人首先開礮轟擊我軍濟遠大副沈壽昌堅守礮位竭力還攻及中破陣亡則柯建軍繼之旋又陣亡則黃承勳繼之爭趨死地義不顧身卒能擊退敵船保全戰艦功既奇偉志尤可嘉此次陣亡副將鄧世昌等幾經臣奏請蒙 恩加等優卹在案沈壽昌諸人同一忠勇捐軀自當籲懇 恩施以慰忠魂而作士氣又奏九月十一日准總理衙門電開本日奉 旨洋員漢納根在冊軍營差教練有方此次大東溝之戰奮勇効力深堪嘉獎加恩賞給二等第一寶星以示鼓勵欽此當飭水師營務處按照等第製成寶星發交祇領此次海戰洋員在船者共有八人陣亡二員受傷四員該洋員等以異域兵官爲中國効力不惜身命奮勇爭先洵屬忠於所事深明大義較之中國人員尤爲難得漢納根仰蒙 特恩獎賞西人傳播欽羨有加其餘死事立功各員自應一體給予獎卹茲據丁汝昌及漢納根開單呈請

具奏前來。臣等加查核所有單開陣亡之定遠管帶洋弁尼格路士余錫樹二員擬請按照西國章程給予三年薪俸以示體恤其力戰受傷之總管鎮遠礮務德員哈卜門擬請以水師參將用幫辦定遠副管駕英員戴樂爾幫辦定遠總管輪德員阿禮成幫辦鎮遠管帶英員馬吉芬均擬請以水師遊擊用該四員並請 賞戴花翎給予三等第一寶星查西國賞功之典固重寶星至應募來華各員尤以得中國官號爲榮足見仰慕華風情殷報効漢納根本有花翎總兵銜此次在船督戰尤爲出力可否並請 賞加提督銜以示優異出自 恩施逾格以上各洋員所請獎卹如蒙 俞允應請 特旨宣示愈足堅其効力用命之忱 上諭李鴻章奏查明海戰出力員弁請獎一摺八月十八日海軍各艦在大東溝洋面與倭艦接仗各將士奮勇出力自應量加獎敘右翼總兵劉步蟾著以提督記名簡放並賞換格洪額巴圖魯名號左翼總兵林泰曾著賞換松加助巴圖魯名號升用參將右翼中營遊擊楊用霖著免補參將以副將儘先補用並賞給捷勇巴圖魯名號右翼中營遊擊李鼎新著以參將儘先補用並賞給捷勇巴圖魯名號升用遊擊提標都司吳應科著免補遊擊以參將儘先補用並賞給捷勇巴圖魯名號升用都司左翼中營守備徐振鵬沈壽望均著免補都司以遊擊儘先補用並賞加副將銜左翼中營守備沈叔齡右翼中營守備高承鈞均著以都司儘先補用並賞戴花翎提督丁汝昌著交部議敘另片奏陣亡各員

升請分別議卹等語所有單開陣亡之儘先遊擊中營左營都司沈壽昌著照副將例從優議卹都司銜中軍左營守備柯建章儘先守備黃承勳均著照遊擊例從優議卹署中軍左營守備楊建洛署右翼左營守備徐希顏左翼中營千總池兆瀨署右翼左營千總蔡叔均著照都司例從優議卹儘先把總孫景仁史壽殿王宗堪張炳福何汝賓儘先外委郭耀忠均著照守備例從優議卹擬保把總易文經王蘭芬均著照千總例從優議卹五品軍功張金盛六品軍功王錫山均著照千總例從優議卹又片奏出力及陣亡洋員請分別獎卹等語漢納根前已特賞二等第一寶星著再賞提督銜陣亡之尼格路士余錫爾均著給予二年薪俸受傷之哈卜門著以水師參將用戴樂爾阿達成馬吉芬均著以水師遊擊用哈卜門等四員並著賞戴花翎給予三等第一寶星該衙門知道片二件單一件併發○德麟奏南雄匪首劉叫妹係廣東曲江縣烏泥坑人爲三點會匪總頭目徒黨衆多聲勢甚大粵東所屬地方因屢遭蹂躪而江西邊境被其擾累亦非一次去年十二月間大庾縣屬內耳地方遭其焚掠今年河洞附近鄉應田家亦被其劫掠殆盡甚至圍攻南安府城意在據城奪地妄思大舉經臣開信飛調水陸各軍馳往防剿並將拿獲匪犯懲辦情形先後奏報各在案臣以爲該犯劉叫妹係會匪渠魁衆匪皆聽其號令若不拿獲懲辦不特邊境永無安靜之日且後患不堪設想爰經嚴飭文武各員弁設法購緝並行偵緝聽以破

格之賞許以不次之擢並復兩札交催勒限報獲茲據南安府知府文炳會同南安營參將徐壽春並營帶安字營浮梁都司所屬寶豐大庾縣知縣劉光煥稟報本年五月二十八日據河洞保甲局紳李光耀李介熊等購獲探得劉叫妹現在廣東南雄所屬連察水地方經該處人劉賴古欺留一面令劉李良飛赴河洞局報知駐防該處之安字營卽經該營在後兩哨弁率勇丁由李庚石老雷引路晝夜馳往查拿該府縣得報當以連察水地方係屬南雄州屬山僻之處距州城屬遠該州文武糧長莫及若得移知會拿誠恐聞風遠遁隨卽知會該參將及協防之剛字營並親兵正營各派員弁勇丁馳往會拿該匪劉叫妹聞拿驚起飛步上屋安字營勇奮勇追捕該匪連放洋鎗拒傷勇丁王自廷晝夜之間恐其奪路逃逸衆勇回放洋鎗致劉叫妹右肩右腿受斃傷墜地遂得擒獲扛走不料該匪傷重行至距河洞十餘里之夾江口地方因傷斃命隨將屍身解到昇放城外等情臣查該犯劉叫妹爲粵匪總頭目必有人認識當飭該府縣加查驗並令眼縫劉李良及監提匪黨陳勝金等確認委係劉叫妹正身取結附卷該匪因傷斃命倖逃顯戮卽飭該府縣會營驗明戮屍以示彰國法又先據南安府知府文炳稟報據駐紮府城外五里山南安營練兵緝獲匪首陳勝金一名並於該匪身上搜出洋鎗子藥短刀又准南雄州移解劉大同古一名又據安字營獲解匪犯李潰幅一名當經臣批飭該府提集擬辦茲據該府文炳

提犯審明錄供稟覆前來臣查該犯陳勝金係廣東南雄州人胞劉叫妹糾邀入三點會與劉叫妹結拜兄弟爲該匪第六名頭目屢次搶劫過客及婦女得贓又該犯李洪福係廣東仁化縣人胞從劉叫妹族人劉牛嵐糾邀入會傳受口號暗記隨同圖攻南安府城搶劫內夏各店鋪分得贓物並行劫鄧應出家得贓該二犯以會匪屢次夥劫得贓並圖攻府城均屬法無可貸卽經批司飛飭該縣督縣會營提犯陳勝金李洪福驗明綁赴市曹就地分別處斬梟首解赴犯事地方懸竿示衆以昭炯戒劉大同古一犯據供廣東南雄州人因貧隨同搶奪並未拜師入會核情不無一錢可原應請從寬貸其一死飭縣遞回該犯原籍南雄州監禁二十年俟限滿察看辦理又據袁州府宜春縣知縣楊煜稟訪有匪首僞軍師胡堅臣改換姓名隨從黨與潛匿於湖南瀏陽交界之慈化地方當經該袁州府訪聞飭拿並該縣帶同該縣司巡檢徐錫錄等密購眼線率帶兵役馳往查拿該匪胡堅臣率黨拒捕用銅鎗致傷馬兵王標等兩名經該處文童張香山見匪勢猖狂奮勇上前格去銅鎗用鐵尺傷其腳灣倒地各兵役竭力合拿匪黨見勢已敗乘間翻山脫逃卽經員役兵丁將該犯胡堅臣獲住查胡堅臣平日賣藥咬訟爲生狡猾異常爲會匪著名頭目曾充僞軍師與已獲正法之鄧海山同謀起事並自開山堂散賣飄布至三百餘張之多實屬甘心從逆罪不容誅前經湖北督撫臣煜次開單咨緝未獲今既拿獲訊供不諱應照章懲辦以

昭炯戒而除隱患當經臣行司會局飛飭袁州府知府惠格提犯覆訊明確如果犯供相符卽行將縣會
營提犯驗明綁赴市曹就地處斬梟首傳赴犯事地方懸竿示衆具報以上五犯除劉大同古一犯遞解
外其餘四犯均係會匪頭目或爲總匪首或曾自開山堂該地方文武不分畛域設法捕拿各該員弁久
戍邊境始終不懈積半載之經營同心合力始將首匪就擒消除邊境大患實屬勞績異常自應請旨
破格從優給獎以昭激勸而示鼓勵得旨准其分別保獎該部知道○己亥日人取我九連城及安東
縣○諭朕欽奉 慈禧端佑康頤昭豫莊誠壽恭欽獻崇熙皇太后懿旨本年予大旬慶辰皇帝率天下
臣民臚歡祝嘏前經傳旨內而王公一二品及武大臣外而將軍督撫都統提鎮照例應進貢物緞匹均
毋庸進獻以示體恤茲當慶典屆期該王公大臣等仍循舊例呈進貢物係屬出於至誠若仍不允准無
以申臣下將敬之忱轉若近於矯情均著加恩賞收所有此次呈進貢物之王大臣等著各賞給福字一
方壽字一方如意一柄蟒袍一件尺頭二匹用示行慶施惠至意○洪良品奏 臣前閱邸鈔見黃錦鑄餉
一疏意在便捐輸而廣招徠乃 臣更有實能籌餉裨益捐例爲資鐸之所未言者近來捐務已成勢家實
由到省人員沉痾無事不足以資衣食而各省每患人滿無所用其差遣故請停分發者紛紛 臣查稅釐
兩局需用委員居多自總辦而下曰寫票曰查驗曰賬房此皆漢人衙夫之職今則皆委之於書吏閒人

以致百弊叢生無可究詰總辦或督撫私人並非本省官吏尤易恃勢作奸今請一切易以候補人員總辦則委道府州縣其寫票查驗賬房等務則委佐貳佐雜人員若有作弊者可以立行參罰至幕友一門漢唐皆以功曹承掾爲之而刑名錢穀爲重刑名錢穀皆屬朝廷公務自應歸官辦理凡幕友之弊有四一曰不通文理刑錢兩席各省皆有黨援大半皆浙紹人私爲世業末通文理卽習刑錢得館之後辦理案件無非照本宣科於事理實不明白計一省之內能辦案者不過數人一曰恃勢誤事州縣刑錢類皆由上司及上幕推薦其人卽不能辦事而能恃勢作威主人無敢得罪薦主者往往聽其貽誤一曰糜費養贖刑錢歲脩多過千金少亦數百州縣養廉已不敷此一項而幕有幕派其人恃館金豐厚徒益騷擾者卽爲賄託資案所由起一曰無關賞罰幕友卽或誤事不過失俸而已無處分以儆之仍可去此他圖故若輩無不自肆其能自愛者鮮矣今請將幕友一項另議歸公其中有熟悉刑名錢穀者責令捐納候補實職方許充當其不能捐者革去而以候補人員中之能通刑名錢穀者充之候補人員在省先令在發審局學習一年然後入幕卽作當差上司再考核其能否以爲賞罰州縣止習一人外卽可帶一佐雜學習分其脩金以抵薪水並將其姓名報部以爲處分之地總計一省之內自上督撫司道下及府州縣以至稅釐各局所用不下數百人誠一皆改用候補人員以復漢唐舊制將入仕者莫敢不究心

公事吏治既可整振興而需用人員益多上兩得所安置自不至請停分發捐生到省有事自然益形踴躍庶於捐務大有裨益而籌餉卽亦無難矣臣夙知本省幕友不准在本省服官茲請實其捐納亦依此例辦理並仰舒有言爲政不行其者必變而更張之乃可理也臣爲通籌餉項起見可否請旨飭下部議施行上諭給事中洪良品奏通籌餉項請飭將各省稅釐局寫票等差改用候補人員並令幕友捐納實職等語咨部議奏○予岳廣德等一百二十八人武進士及第出身有差○庚子日軍由皮子窩登岸進逼旅順○諭軍機大臣等奎英奏綏遠城將軍克蒙額私娶屬下土默特旗婦爲妻妻弟巴圖納遜等出入衙署肆行無忌復敢串通將軍旗女配與克蒙額之子爲妻請將土默特蒙古騎校巴圖納遜額德力庫綏遠城鎮紅旗滿洲佐領巴圖隆阿正藍旗滿洲防禦吉瑞一併革職等語所奏是否屬實著張煦確切查明據實具奏毋稍徇隱原摺著鈔給閱看將此諭令知之○辛丑諭軍機大臣等據裕德廖壽恆奏成都駐防官兵別無領項遇有出差向由官兵自行捐幫盤費請飭另籌津貼等語成都旗營生計維艱遇有出差復令自捐盤費殊不足以示體恤著恭澐體察情形酌量另籌津貼專款俾資公用而免苦累原摺著鈔給閱看將此諭令知之○諭前因成都將軍恭澐奏參副都統雅爾堅進京隨帶官兵十七名所需路費擅扣兵餉私動庫款與雅爾堅回奏迥不相同當諭令裕德廖壽恆確查具奏茲

據查明擬奏雅爾堅於隨帶官兵路費尙無扣兵餉私動庫款情事惟回奏時未將官兵捐解銀兩詳細陳明實有不合恭摺於官兵自借捐解乃嘉慶年間所議捐解章程未經詳察率行具奏亦屬非是恭
壽雅爾堅均著交部議處○諭前據御史張仰忻奏江蘇代理鎮洋縣知縣郭罔被丁役誣瘋網縛等情
當經諭令劉坤一確查究辦茲據查明擬奏此案代理鎮洋縣知縣郭罔辦理命案避章遁匿丁役串通
舞弊竟敢誣爲瘋病將郭罔父子橫加網縛太倉州知州程其珏係屬本管上司近在同城並不親往驗
明率以郭罔患瘋等情冒昧稟報辦理種種乖謬復不通稟意在顛倒從心尤屬狡猾業經該督奏明斥
革著永不敘用刑部周玉田雖無受金舞弊實據惟與家丁胡吉倚護不顧公事實屬不合著勒令回籍
不准逗遛家丁陸福差役胡明桂均著依擬完結餘著照所議辦理該部知道○溥麟奏查歷科 殿試
大金榜用 寶例應內閣學士監視今本科武 殿試金榜奏明於二十六日丑刻請用 皇帝之寶奴
才謹遵於是日子刻進內敬謹將事始知讀卷大臣因二十五日兵部未將甲第單送到未能繕寫金榜
奏 聞並知照 交泰殿俟甲第單一經送到即趕繕金榜無論何時繕竣即刻請用 皇帝之寶各等
因在案二十六日未刻金榜繕竣奴才卽率同承辦官員齊捧恭詣 乾清門監視在正敬謹用 寶之
際該請 寶之太監二名內有頭戴金頂太監一名痛斥奴才等到進肆口辱罵其言語穢褻有不堪形

諸奏陳者奴才以內廷重地且正在敬謹用寶之際未敢剖辯一詞似此咆哮宮門辱罵職官實屬目無法紀相應請旨飭下內務府查明從嚴懲辦以肅綱紀而儆效尤上諭內閣學士溥頤奏執事太監辱罵職官請飭查辦一摺據稱本月二十六日該學士詣乾清門監視武殿試金榜用寶有請寶之帶金頂太監一名斥該學士等到運肆口辱罵請飭查辦等語內廷用寶理宜嚴肅且執事各員到差遲早亦非內監等所應問乃該太監竟敢辱罵大員實屬肆無忌憚著總管內務府大臣確切嚴查奏明懲辦○命候選郎中鮑祖恩馳往宋慶軍營馳候差委光祿寺署正麟祥馳往依克唐阿軍營馳候差委○壬寅諭軍機大臣等戶部奏遵議雲南辦運京銅情形一摺據稱滇省辦銅每年解到兩批本年雖據報解兩批而能否運到一批尙難預定至所報米價則與該省月報之案加至二十倍所稱礦質則與從前出銅之數減至十數倍顯有不符請旨嚴飭整頓等語京局鼓鑄需銅萬緊迭經嚴諭唐炯增批辦運現在洋銅停購專恃滇銅解京應用唐炯自當竭力經營何得託詞諉卸著卽懷遵迭次諭旨認真整頓設法採煉務使京銅按年增批起運以供鼓鑄倘有延誤卽著戶部奏明請旨從嚴懲辦決不寬貸至本年所撥各省銅本銀兩或尙未解齊或未據報解並著戶部嚴行咨催如各該藩司任意遲延卽著指名參處原摺著鈔給唐炯閱看將此諭知戶部並諭令唐炯知之○諭步軍統領管理地方事務責任綦重

福銀差使較多深恐未能兼顧著開去步軍統領之缺步軍統領著榮祿補授

冬十月甲辰朔時享 太廟遣世鐸恭代行禮○日人取我鳳凰城○鑲黃旗蒙古都統容貴因病乞休

不允予假一月調理○乙巳諭前據給事中吳光奎奏參四川省吏治貪縱開單列款請飭查辦等語又

御史鍾德祥奏參知縣耿士偉等各款先後諭令裕德廖壽恆查奏茲據查明繕單覆奏此案原參四川

調署各缺專重貨幣及濫刑勒贖諱案不報各節均無實據惟現因委署及外結繫杖章程不無流弊即

著四川總督申明舊章飭令藩司將州縣各缺核明立案嗣後委署缺出分別缺分照章辦理並將外結

繫杖章程即時查銷查明各屬繫杖人犯若干名酌核開單改擬具奏嗣後如有濫刑私押等弊並著該

督嚴飭各屬一律禁革責成各該管上司隨時稽查倘敢扶同徇隱即行據實嚴參其單列被參各員除

查無證據諸員均毋庸置議外著已縣知縣耿士偉於門丁指官擾累得多職難辭縱容之咎又違例

罰銀充公平日用刑過酷調署富順縣知縣王樹枏在資陽縣任內刑獄現死多人雖非同案重犯究屬

疏於防範且有案犯因杖責過多後旋病故亦屬有違定例著遂寧縣知縣裕元所用門丁過案勒索

敲詐騙經潼川府因案札提裕元輒以查無此人照覆追裕德等迭飭交出又稱於交案時潛避並令將

稅契收押各簿帶去至要案內應行錄供發房各等情裕元均未辦理而於田業控案則希圖稅銀諸多

擬畧實屬荒謬吳常秀山縣知縣王壽松以自理詞訟輒委典史審訊殊屬不合南江縣知縣曠超一用刑既重竊犯尤多以至旌善亭等處皆爲管押人犯之所並有案犯滿理方在押自盡未經驗報其子押禁繳回公款久不釋放情事原參濫刑濫押實非無因榮縣縣丞阮文鏞擅責副貢生顏錫汾致被押士聯名稟控實屬辦事顛預前署該縣知縣孟積申審訊此案尙無不合惟於該副貢生未經詳革之先遽行刑責究屬非是署漢州知州楊登荆謂監生顏錫光等各款在因案責押之後旋被上控有案雖非勒罰入己實屬不合忠州直隸州知州蔣家啟任信門丁遇事招搖以致民間切齒至承審案件或未能明晰或竊改原供或判斷多偏並因案被押之人允許拜門致門丁從中乾沒銀兩且平時刑求過當實有應得之咎大足縣知縣沈全修任分什弟出署閒遊民間噴有煩言雖無招搖確據究屬不知避嫌內江縣知縣曾憲仁上年十二月間曾經該縣舉人江維斗等以批判譌誤喜用重刑添設私卡勒折糧稅縱容丁役等款具控委員查覆均非虛語該督臣案以該員才具粗庸奏請開缺另補實屬難應民社耿士偉曠超一蔣家啟王樹枏王壽松楊榮沈全修均著交部議處裕元曾憲仁均著革職永不敘用阮文鏞孟積申均著交部分別議處以示懲儆耿士偉被參案內已革同知銜監生張崑被差役萬清門丁梁月亭在外招搖詐取銀兩蔣家啟被參案內跟役樊三卽樊岐軒多受銀兩均著照所擬罪名分別發配

士倬猶僕之子吳清泉仍著耿士倬拿獲交案並著山東巡撫將吳清泉嚴拿務獲解交四川備案訊辦
餘均照所擬辦理該部知道單併發○諭戶部奏核議四川官運局積存副本欸目請飭詳晰盤覆開
支護本一欸應令妥議章程並御史鍾德祥奏官鹽如有失事向由船戶賠補從不挪動護本各摺片先
後諭令裕德廖壽恆查明覆奏茲據逐欸查復開單呈覽一摺四川官運開辦以來徵收雜欸名目繁多
數年以後始經減定收支各項均經詳報有案惟該局各欸盈餘多不照章依時指撥以致輒將四綱雜
欸全數開支殊非慎重帑項之道候補道夏時總辦局務出納是其專責乃於無札無詳之件率行支給
難保無浮開情事且動撥多項欸目任意支銷實難辭咎夏時著交部議處已故四川總督丁寶楨於欸
目出入未經整飭札提公費等欸多不聲明均有不合惟該省鹽務自減設原斤包口以後積引遂以疏
通其補救之功亦不可沒著免其置議該省官運局積弊已深極宜認真整頓嗣後著實成四川總督將
該局外銷之欸一律造冊報部並釐定動撥一切欸項以杜虛糜另片奏開銷護本其弊不在補配發銀
之日而在呈報失事之時自應以整頓押運管事人役及船戶為要議等語嗣後鹽船如有失事仍著遵
照向章實成該州縣確查稟局並稟知該督以資查考一面仍由該局嚴飭附近局卡委員親往勘報並
將每年船隻失事起數沉溺鹽斤細數及收支補配各實數分廠分岸造冊報部用昭核實又片奏行鹽

道里時刻誤列宜昌等處又引張額引數目新志與原奏不同稅釐歲解銀數與奏明每引所收京引不
符各等語著交部查明分別核辦餘均照所議辦理該部知道片二件單五件併發○諭前據御史鍾德
祥奏四川寶州知州高培穀浮收錢糧勒取規費各節當經諭令裕德等確切查辦茲據查明奏高培
穀雖解浮收勒取等情事惟於蘇敬廷賄案輾轉至七閱月之久株連至三十餘人之多不無擾累高培
穀著交部議處餘照所議辦理該部知道○諭前據御史鍾德祥奏四川涇縣百姓浪奏無實及新都等
縣匪徒聚集燒搶情形各摺片當經諭令裕德廖壽恆確查具奏茲據查明奏秀山縣知縣王壽松署
酉陽直隸州知州宋學曾於所屬團丁稟報有傳習邪教聚集燒殺情事立即派兵馳往圍拿尙無不合
惟當地方擾動進剿時未能先事約束至秀山縣團丁有誤拿無干之人三十餘名並誤燒房屋八十餘
戶之事酉陽滋事之時附近地方團兵圍擊致有波累無辜者王壽松宋學曾均著交部議處王壽松縱
其子潛出閒遊未能覺查禁止審理案件並不照例擬辦究屬不合著再交部議處該二員於市經剿辦
之際所稟情形語涉鋪張茲據劉秉璋奏請擇尤保獎之案並著撤銷餘著照所議辦理另片奏新都金
臺綿竹等縣匪徒聚集燒搶及省城會匪橫行各節或查無其事或傳聞失實均著毋庸置議該部知道
○諭前據御史鍾德祥奏川鹽各弊官吏吞沒商民股削等情當經諭令裕德廖壽恆馳往四川查辦聞

又據該御史奏稱四川鹽局簿據皆係事後改換惟提井場各電商鹽及引岸各行號買鹽帳簿查閱
抽對即可核出真情等語復諭令裕德等斟酌辦理茲據查明據實覆奏官運濟楚漏稅偷釐影佔商岸
以致公私交病總辦局務唐炯自奏定章造銷混隨辦局務道員夏時相率徇隱含混撥金致虧課款
甚多均著交部嚴加議處四川總督劉秉璋於前任照詳辦理之案未經更正又不據實奏明亦有不合
著一併交部議處餘著照所議辦理另片奏各員公費請分別支給停止調查商號帳簿據力求核實
以杜弊端等語均著照所請行該部知道片二件併發○諭榮翰奏宋臣呂大臨請從祀 文廟一摺
著禮部議奏○前貴州巡撫潘蔚卒予祭葬○以黃河安瀾予開歸陳許道桂霖等優敘有差○丙午以
國俊爲西安將軍○丁未諭軍機大臣等現在倭寇擾及秦境畿境喫緊兵力尙形不足著鹿傳霖挑選
勁旅數千派令得力將領統帶入衛切勿延緩○戊申諭現在畿輔大兵雲集著派恭親王督辦軍務所
有各路統兵大員均歸節制如有不遵號令者卽以軍法從事慶親王奕劻著幫辦軍務翁同龢李鴻藻
榮祿長麟並著會同商辦○諭寧夏鎮總兵衛汝貴管帶盛軍臨敵退縮以致全軍潰敗並有起扣軍餉
縱令兵勇沿途搶掠情事衛汝貴著革職拿問交刑部治罪海軍提督丁汝昌統帶戰艦不能得力所有
前次交部議敘之案著卽撤銷該部知道○召劉坤一入覲調張之洞署兩江總督兼南洋通商大臣仍

以譚繼洵署湖廣總督○已西輪軍機大臣等程之倖一軍前經降旨留於金州會同連順徐邦道趙懷
業等合力防剿現在倭氛已偏金州而程之倖行抵何處杳無信息殊深憤悶著李鴻章迅飭沿途電局
並地方官設法探明催令星夜各赴防所倘查有畏葸玩延情弊卽按軍律懲辦毋得稍涉徇縱○命翁
同龢李鴻章剛毅爲軍機大臣○以牛師勳署甘肅寶興鎮總兵○李鴻章電致總理各國事務衙門金
州副都統連順大連灣徐邦道趙懷業等朔電頃丁提督已帶兵船抵灣惟程提督之倖聞於二十一日
由營口起身順等已數次專馬函催皆未回來不知該軍現抵何處大連灣既有兵船嚴密防護海面無
虞但須嚴守後路各要口日兵倘或前來懷業邦道等竭力抵敵但恐兵力不足仍求准速撥數營幫同
援應並可相機進剿共深叩禱再據密探面報日人前到洋花園其兵輪及木質商輪等四十餘隻兵輪
不過十餘隻另有舢舨百餘隻上山後紮營十里長二里寬其馬匹因在船撞擊仍在該處調養昨日到
皮子窩各處擄壯年百姓將臉漆黑剪去頭髮改伊國裝束爲打頭敵槍地雷礮子之用並有高麗人數
百持夾把刀在前行走云鴻查日人久注意大連灣旅順後路數年經營嚴密船陽實費財力兵力然北
洋兵分力單旅順僅慶軍六營分守東西各礮臺采慶八營駐守後路嗣宋慶遠出調姜桂題程允和六
營替防又令慶軍東西岸各添募一營要程亦各添募一營合之不過八千人諸將來電仍以後路口隘

紛歧不敷布守大連灣又爲旅順後路扼要之所耳爲犄角前令劉盛休八營駐守嗣銘軍遠出調遣懷
業新募大營替防又調徐邦道馬隊一營及新募步隊四營前往協守頃因兵力單薄又令徐邦道就近
添募一營合之亦不過五千七百餘人新募之卒誠慮能守而不能戰今日寇大股既由皮子溝內竄距
金州大連灣百餘里距旅順亦僅二百餘里兩處勢均岌岌迭經電催程之偉帶營兵二千往援該提督
自離營口後中途無電局亦不知行抵何處有無阻礙海旅與津中隔大海敵船游弋不定籌辦諸事均
形掣肘殊深焦急謹請代奏 上諭軍機大臣等現在倭氛逼近金州旅順後路危急船隔要地亟應盡
力保護李鴻章專任海軍不得以金復非直隸轄境稍存諉卸著悉心籌畫再行調撥就近海防兵勇前
往援應與晏桂超等各軍竭力固守毋得畏難推諉致干咎戾○庚戌命編修陳嘉言會廣鈞馳赴吳大
澂軍營聽候差委○命主事楊登甲馳赴吳大澂軍營聽候差委○命剛毅以待郎候補以馬丕瑤爲廣
東巡撫○奎英奏前於本年七月二十五日准山西巡撫咨開欽遵 諭旨咨飭大同鎮統帶駐紮包頭
之大同練軍馬隊四旗步隊一營刻日赴通行令酌調緩速旗兵派員管帶暫行馳駐包頭以資鎮懾一
俟添募新兵到防再行調換編旗等因當經奴才克欽細飭令管帶馬隊委營總海營等分爲四起督率
所帶官兵二百十四員名配齊軍火器械於七月二十九日起程馳往包頭暫行扼紮以便巡防等因當

經奏明在案嗣於八月二十五日准署大同鎮總兵沈玉貴咨稱奉文責派署左營游擊郝發先將調到附近營外之兵管帶數百名遵程前進務於八月杪馳抵包防替換綏遠之兵歸旗等因前來奴才卽飭綏遠馬隊官兵一俟署游擊郝發先管帶營兵到包接防後迅卽整隊起程沿途小心約束兵丁不准稍有需索滋擾今管帶馬隊官兵委營總春普等督率所帶官兵於九月十五日回城報到奴才體察地方情形歸綏所屬地面遼闊迤北大青山後一帶及通東黑寧二廳所屬大路時有外來游匪勾結本地馬賊聚眾持械邀劫道路肆行搶掠經派令該馬隊官兵不時分路四出巡緝嚴密訪拿盜風始見稍戢地方賴以安堵今該馬隊官兵現已替換回城擬請仍舊留防奴才督飭該官兵常川操練以資防禦而裨地方詳查綏遠城原設留防馬隊官兵二百十四員名月支餉乾銀兩所有帶隊官員按照察哈爾換防支餉章程支領其馬隊兵丁月支餉乾前自光緒九年正月起遵照部定章程冬春兩季每月支銀七兩夏秋二季每月支銀四兩大錢並照湘平每兩撥扣銀四分給發至營省每年充撥防餉銀一萬兩歸綏道庫徵收稅課項下每年撥充防餉銀九千餘兩按照擬留官兵月支餉銀數目撥計尙敷需用合併聲明下兵部知之○癸丑 慈禧端佑康頤昭豫莊誠壽恭欽獻崇熙皇太后六旬萬壽聖節 上率

王公百官詣 皇極殿行慶賀禮○日人取我金州○先是李鴻章電商李秉衡請移駐防登州之夏辛

西嵩武四營渡海赴旅順後路協防李秉衡以登防空虛難以抽撥辭職軍復商請移駐防膠州澳之章
高元馳赴旅順李秉衡允飭登州鎮章高元統所部三營並調動旅五營刻期至登州取齊備商輪往載
赴旅由總理各國事務衙門代奏至是 上諭軍機大臣等李秉衡電悉章高元八營著照所請即日東
渡毋得刻延著李鴻章派船速往載運○甲寅日人取我大連灣○譚鈞培奏雲南石屏建水江川等縣
被水並永平縣山塌覆壓民居田地成災委員撫勘情形得 旨著卽飭屬妥爲撫恤毋任失所○丙辰
諭軍機大臣等前於初三日因旅順防務緊要電飭李鴻章身親巡歷激勵守禦迄今旬日不見一字覆
奏此外電詢飭查之件亦多無覆電當此軍情萬緊之時豈容如此玩誤現在旅防日危該督更無籌辦
但付之焦急二字定遠各船前奏三十五日修好嗣又稱起碇機器未全已久逾前限不意今日來電仍
云尙未配妥來遠亦只修一半不知兩月以來丁汝昌所司何事殊堪痛恨定遠爲該軍制勝利器今據
稱水道狹隘不能轉動似與來遠均尙在鴨甲未出儻被賊堵口且不啻拱手齧盜矣著丁汝昌卽日前
往旅陽將兩船帶出倘兩船有失卽將丁汝昌革職正法李鴻章當懷遲諭旨辦理諒無從再爲捏飾旅
順援兵仍著設法運送不得因來往冒險膜視不救也並著卽日覆奏○諭榮祿等奏特參空誤值班之
門領等官請旨革職一摺各城門門領等官盤查啟閉例應常川駐守不准頃刻擅離乃該門領聯壽等

竟敢值班未到實屬有職職守安定門領聯勝門千總康景沂著一併革職以示懲儆○諭定妥辦理
東三省練兵有年乃平日訓練不精以致所調營勇臨陣不能得力實屬大負委任正白旗漢軍都統定
安著交部嚴加議處依克唐阿督兵進剿節節敗退延於賊渡和河等處未能援救亦屬畏葸無能
黑龍江將軍依克唐阿著交部議處○以黃河安瀾予濟奉武臨道張上達等優敘有差○丁巳以剛毅
署總部右侍郎○以彭楚漢署長江水師提督○命錫伯營領隊大臣穆隆阿留京當差○命李鴻章赴
大沽北塘等處巡閱布置○戊午 上御文華殿駐京美國使臣田貝俄國使臣喀希呢英國使臣歐格
納德國使臣紳珂法國使臣施阿爾比國使臣陸爾萊瑞國使臣柏岡日國署使臣梁威哩覲見恭祝
慈廟端佑聖訓昭豫莊誠壽恭欽獻崇熙皇太后六旬萬壽○追予故提督劉清亮祭葬○諭軍機大臣
等有人奏倭軍半係葉志超衛汝貴等潰敗之卒有記名提督龍殿揚之姪龍稚梅為之分統龍殿揚屢
經彈劾罪惡昭著李鴻章獨任以招募深恐貽患將來又匯豐銀行買辦道員吳懋勳以米八千包接濟
倭軍並偕倭人往繪北海關海里吳懋勳係鐵路總辦舉鐵路以昇倭亦在意計之內各等語著按照所
參各節密查覆奏不得稍涉徇囑○諭軍機大臣等翰林院侍讀學士徐致靖奏順大等處被災請飭廣
籌賑捐一摺著戶部順天府會商妥議具奏○命王之春如俄唁俄皇亞力山德之喪並賀新皇尼可來

第二卽位○諭今夏畿輔一帶雨水過多閭閻困苦現在天氣漸寒小民生計維艱朝廷倚深慮系繫孫家鼎陳彝將籌款辦賑事宜妥爲經畫並督飭各地方官認真辦理務使實惠均霑不准稍有弊混○己未諭軍機大臣等有人奏前月底天津有戈什哈押船戶運米兩船將赴海口船戶情將米包拆開俱是火藥惟面上數包是米船戶赴關道首告查驗果然並有督署圖記關道卽赴督署稟陳至今尙無發落等語如果實有其事自難掩人耳目著李鴻章據實具奏不准稍有徇囑○諭前經諭令各衙門堂官逐日進署辦事不准懈怠現在時勢孔棘各該衙門堂官尤當力振因循常川進署督率司員將應辦各事悉心經辦不得稍有玩愒用副朕勤求治理至意○以龍錫慶爲湖北按察使○庚申諭軍機大臣等吳大澂電稱據李鴻章電覆粵東迭解餉位分撥各營僅存軍餉四萬又八千餘兩子少等語前旨令李鴻章查明現在餉位若干何以並無撥奏此項撥給吳大澂之餉又因子少難用能否趕造合股餉子俾利器不致虛擲仍著李鴻章迅籌電覆○伊犁將軍長庚呈進貢馬○辛酉諭吏部奏遵議處分一摺督辦雲南礦務唐炯著革去巡撫銜加恩賞給五品頂戴仍留雲南督辦礦務四川候補道夏時著卽革職四川總督劉秉璋降二級留任不准抵銷餘依議○壬戌諭劉坤一奏前辦上海招商局廣東候補道張鴻祿因虧空局款被參革職開復後仍在上海起造花園聚集遊人日事徵逐聲名甚劣實屬行止卑鄙

有玷官箴張鴻祿著卽行革職勒令回籍不准逗遛上海以儆官邪○諭大學士額勒和布才欠開展張之萬年逾八旬均著毋庸在軍機大臣上行走○諭刑部奏遵議處分一摺正白旗漢軍都統定安黑龍江將軍依克唐阿均著照部議革職定安著暫留奉天辦理東三省練兵事宜依克唐阿著統率所部戴罪立功以觀後效該部知道○甲子日人取我岫巖州○王廩奏臣於光緒二十年八月二十二日准戶部咨開議覆編修張百熙奏請餉各款一摺於光緒二十年七月二十六日具奏奉 旨依議欽此鈔錄原奏 諭旨飛咨到湘查部議鹽斤加價一條內開光緒十年間湖廣將川淮鹽價每斤加二文湖南將粵鹽每斤加二文現在均未停止擬請每斤再加制錢二文以佐軍需軍務一平卽行停止或令各商先行墊繳抑或陸續帶繳統由該省督撫體察情形報部核辦等因臣查湘省食鹽以淮鹽爲大宗由兩江督臣派員來湘按票抽收釐課粵鹽分引行郴宜衡永等處多係肩挑負販由廣東載運而來川引係由澧州所屬借銷均附於湘省釐金局委員設卡抽收釐稅淮鹽道遠運艱商力本形拮据值此東征需餉之際自應竭力籌維遵照部議將淮鹽每斤加價二文仍照正引六百斤核計併入牌價陸續按引扣收隨時帶繳歲計可收銀七萬餘至粵鹽於光緒十年經前署撫臣龐際雲奏加價二文接濟餉需現仍照舊抽收自應再加制錢二文專備東征之用惟粵販入湘路徑紛歧最易繞越惟有設法堵截計每年

可收銀萬餘其借銷澧州川鹽光緒十年前署湖廣督臣卞寶第雖有加價二文之議維時因行湘川鹽已在鄂省萬戶沱加價是以湘省未經加抽茲當萬無可措之時應爲稍少成多之計亦擬加價二文惟銷路僅抵澧州一隅爲數無多應飭儘收儘解川粵鹽斤加價照舊仍於局卡按斤抽收每月報解據總理釐金及督銷淮鹽各總局司道會詳請奏前來臣覆核無異此次議加淮川粵鹽賣價擬由臣出示於本年十月初一日起一律加收以歸畫一仍俟年終彙案奏報下戶部知之○王廉奏湘岸淮鹽光緒十年前署湖廣督臣卞寶第因籌辦江防奏請於鄂湘口岸食鹽每斤酌加二文湘中始末增加後經前兩江督臣曾國荃飭局籌議每斤加價一文作爲江防經費十二年卞寶第回湖南巡撫任籌撥雲南協餉適值江防早撤奏請將所收淮鹽加價一文改撥餉餉歷經照辦在案是光緒十年湖廣雖有湘岸淮鹽加價二文之議始終實有抽收加價一文現在部中以爲原加二文故東征軍餉議令再加二文自應遵照辦理以備畫一業將加收情形另摺奏明惟從前所議淮鹽加價節年祇收一文其未經抽收之加價一文可爲因利補苴之計伏查湘省每年解撥京協各餉及本省軍餉加之近年募勇東征供應浩繁不能不未雨綢繆預爲籌備擬請自本年十月初一日起將前項議加未收之淮鹽加價一文一律照收留備備況江防經費鄂岸原加二文江南原加三文現在東征軍餉議令統加二文今湘岸補加一文合

之先後每斤仍是加收四文與鄂湘等比之江南尙少加一文並非於奏案之外另有所加且此項加價出自食鹽之戶以每人日食鹽之錢計之每人一月所費不滿一錢貧民食戶不致因此受累淮南更無所損而餉需實有裨益下戶皆知之○以恩澤爲黑龍江將軍榮祿爲正白旗漢軍都統○乙丑命劉秉璋來京調譚鍾麟爲四川總督以邊寶泉爲閩浙總督○以傅勒精阿爲理春副都統○李鴻章電致總理各國事務衙門丁汝昌效電鎮遠前因進口時爲水雷浮標擦傷進水昨已將夾底上之水抽乾並派人下查數次未能覓出傷處現用帆布兜底趕抽夾底之水冀速覓傷處設法堵塞左翼總兵林泰曾以時棘船損痛不欲生明刻服毒辰刻身故現派副管帶楊用霖暫行護理趕速抽水補塞以便出海云鴻已電覆准楊用霖護理 上諭軍機大臣等本日據李鴻章電奏鎮遠爲水雷浮標擦傷進水總兵林泰曾服毒身死等語覽奏不勝詫異丁汝昌電稱鎮遠前因進口時爲水雷擦傷似此電之前已有電將此事原委報明李鴻章而李鴻章並無電奏此船原泊何處進何口被水雷浮標既是水雷浮標應確傷船幫何以擦傷船底又何致派查數次未能覓出傷處林泰曾縱因船損內疚何至速爾輕生來電敘述既屬含糊情節更多疑竇殊堪憤悶難保該船無奸細勾通用計損壞著李鴻章嚴切查明據實詳晰覆奏不得一字疏漏京津耳目甚近此事實情無難卽日發覺諒該大臣亦不敢代爲掩飾也○丙寅諭行軍

之要紀律爲先現在大兵雲集所有各路統兵大員務當約束兵丁嚴禁騷擾遇有購買物件不准稍有抑勒並著隨時查察如有沿途恃衆逞強擾累居民者立即正法倘該管官縱容徇庇一併嚴參懲辦勿稍寬貸將此通諭知之○丁卯李鴻章電致總理各國事務衙門丁提督前報由旅順回威海進口時鎮遠船幫被水雷浮標擦傷進水因水未提淨暫未能覓出傷處鴻飭其趕緊提水補漏林泰曾向來膽小想因疏忽內疚輕生未必有奸細勾通用計損壞現正覓匠就威海機器廠設法修補奉 旨查詢俟馬格祿到威後再令查報轉奏因無所用其掩飾也 上諭軍機大臣等李鴻章奏鎮遠擦傷情形已悉鎮遠爲海軍上等船隻一有損壞卽應趕緊詳細具奏不應俟續查始以大概情形電聞此電所敘由旅順回威海進口皆前電所未及殊屬疏忽且海艦管帶自應用奮勇之人既稱林泰曾膽小何以派令當此重任則該大臣平日用人不當已可概見楊用霖係丁汝昌所派果否可能仍著悉心察看聞平遠管帶李和練達出色且賦性忠勇如果屬實卽可調充鎮遠管帶以期得力著李鴻章迅卽查明覆奏○旅順陷○李秉衡奏東省沿河各州縣歷年災賑民困已深本年雖幸三汛安瀾而夏秋雨水過多各處山泉同時匯注低窪處所積潦難消或民田被淹收成無望或房屋衝塌修復無資受患與黃水略同但災區不似曩年之廣迭據各該州縣稟報被水輕重情形當經飭司委員會同各地方官確切勘驗清查戶口

開摺稟辦就其查到各處而論則以濟南府屬之齊東武定府屬之青城蒲臺利津被水爲最重濟南府屬之章邱泰安府屬之東平東阿武定府屬之濱州及臨淄州等處次之如再有續報前來當再隨時委勘除勘明成災村莊循例給賑照案報銷毋庸更議外惟查有沿河一帶被水村莊本年雖屬勘不成災而居民存積餘生毫無生計習俗又復癘悍歷年春冬之間本專恃食賑爲活若因本年被水勘不成災卽拘例章不與賑濟老弱既無以聊生少壯又恐迫而爲匪且利津等處半多近海曾遵奉電旨於利津海口紮營嚴防是值此際更應變通撫綏以免患生意外有不能不爲籌慮者也臣與賑撫局司道再四熟商擬請酌量變通在於賑撫賑捐所存項下並司庫臨倉耗羨項下各提撥銀二三萬兩遴派樸誠道府大員親履各處仿照近年義賑辦法不論災情之輕重祇擇戶口之赤貧量爲撫恤以資補救而靖地方一俟放竣卽將收支細數實用實報另造一冊隨同例賑冊籍一併送部存案備查所提司庫臨倉耗羨銀兩如將來賑捐稍旺仍令如數歸還臣當督率司道及派出之道府大員嚴令放賑卽委各員核實查放不准假手胥吏地約莊長並不准絲毫冒濫務使貧民實惠能沾以廣皇仁而弭災患得有如所請行○戊辰諭前因御史齊蘭奏山東署棲霞縣陳洵苛斂擾民等情當諭令李秉衡查明覆奏茲據奏稱詳查該員聲名甚劣違例加徵屢被控告請辦團練按戶勒派實屬藉端苛斂罔恤民艱著棲霞

縣知縣陳洵著卽行革職永不敘用福山縣知縣唐鴻逵既據查明尙無受賄含混情事卽著毋庸議
餘著照所議辦理該部知道○以馬玉崑爲山西大同鎮總兵琦士成爲直隸提督○庚午諭倉場衙門
奏各旗例領甲米前經戶部申明十七年所定開放二成陳米搭放一成新米章程咨明各旗一體遵照
近來各旗復藉口兵食強欲開支一色致開放時動多爭執請飭遵章辦理等語著戶部轉行八旗各衙
門務照新陳搭放章程一體認領不得任意挑剔該侍郎亦當督飭各監督等照章搭放不得以撥合攤
變之米充數以濟兵食該衙門知道○諭本日倉場衙門奏片一件據寫處字有錯誤非尋常疏忽可比
祥麟許應聯均著交部議處○諭本年近畿一帶雨水過多閭閻困苦迭經諭令孫家鼐等查明災情輕
重妥籌賑恤茲據奏稱請添設粥廠並請撥米石派員監放等語著照所請於永定門外之大紅門大
興通州交界之定福莊各設粥廠一所賞給京倉米三千石卽行分領煮放派大理寺少卿徐承煜鴻臚
寺卿桂斌分往該處稽察彈壓妥爲監放以恤災黎○辛未諭軍機大臣等戶部片奏光緒二十一年內
務府經費擬撥閩海關常稅銀十萬兩應運解北洋著該將軍務於來年開印後陸續交納仍限六月初
解到一半十二月初間掃數解清不准稍有帶欠○諭軍機大臣等戶部奏預撥來年京餉一摺擬在地
丁鹽課等款內指撥銀七萬兩著於來年分批趕解另片奏光緒二十一年內務府經費擬撥廣東鹽課

銀五萬兩著於來年開印後陸續解內務府交納○壬申諭朕欽奉 慈禧端佑康頤昭豫莊誠壽恭
欽獻崇熙皇太后懿旨本朝家法嚴明凡在宮闈從不准干預朝政璫妃珍妃承侍掖廷向稱淑慎是以
優加恩眷游陟崇封乃近來習尚浮華屢有乞請之事皇帝深慮漸不可長堪實面陳若不量予儆戒恐
左右近侍藉以爲資緣蒙蔽之階患有不可勝防者璫妃珍妃均著降爲貴人以示薄懲而肅內政○是
月美利堅國使臣田貝回任

臣朱壽朋敬編

臣章圭璣恭校

十一月癸酉朔諭本年十月 慈禧端佑康頤昭豫莊誠壽恭欽獻崇熙皇太后六旬萬壽所有各省來京協同辦理點世暨隨班祝嘏之道府州縣丞倅及武職各員加恩均著賞加一級卽飭各回本省其隨同叩祝之耆民等著每人各賞給銀一兩該衙門知道○諭軍機大臣等有人奏旅順未失以前總辦道員龔照瑛潛逃回津聲稱旅順失守押離職守搖惑人心等語龔照瑛在旅順是否專辦船局抑或另有別項差使如果有潛逃惑眾等事著李鴻章據實參奏勿稍徇隱○甲戌諭朕欽奉 慈禧端佑康頤昭豫莊誠壽恭欽獻崇熙皇太后懿旨現屆冬令關外嚴寒因思前敵諸軍冒雪衝風備嘗艱苦著加恩賞給皮衣一萬五千件迅卽解交宋慶分給各營俾得禦寒以示體恤欽此卽著宋慶欽遵辦理○命侍衛恩科馳赴長順軍營慰候差委○乙亥頒給四川錦江書院匾額○丙子王懿榮奏 臣於光緒十五年六月在編修任內曾經呈請 臣院掌院學士代奏懇 恩飭下山東巡撫整理衍聖公地產一摺當蒙 恩旨寄諭山東巡撫遴派妥員前往曲阜會同地方官詳細確查應如何設法整頓之處卽據實覆奏請

旨辦理祠經山東巡撫張曜遵 旨覆查具奏大概情形在案仰見我 皇上尊師重道嘉惠商振
風風俗之至意海內臣民同聲感佩巡撫張曜旋以病故出缺後任撫臣未及清理迄至於今 恭查嘉
慶朝 欽定大清會典事例卷一百三十九戶部十二田賦門免科田地下載有衍聖公祭田二千一百
五十七頃五十四畝零四氏學祭田五十頃復聖裔祭田墓田廟基地五十四頃十有五畝零宗聖裔祭
田墓田廟基地六十二頃十有四畝零亞聖裔祭田墓田廟基地五十九頃七十六畝零先賢仲氏裔祭
田墓田廟基地七十五頃五十六畝零康熙二十四年撥准孔林地於原額外增撥十有一頃十四畝九
分除免賦稅又撥准撥給元聖廟公祭田五十頃此 會典所載衍聖公祭田暨先賢元聖祭田墓田之
大數也臣又覆查乾隆間戶部主事孔繼汾所著關里文獻考卷二十六戶田第七所載衍聖公土田之
制由漢及宋時賜時替自宋大中祥符間始專有祀田沿及金元代多增給明洪武時定給祭田二千大
頃歲收其租入以供廟祀餘悉爲衍聖公廟祿 國朝因之明太祖洪武元年賜祭田二千大頃分爲五
屯四廟十八官莊撥佃戶承種永樂五年二月又賜膳廟田七十三大頃正統四年八月戶部覆准存佃
戶五百戶濬人二千丁專以辦納籽粒以供祭祀 國朝順治元年秋九月山東巡撫方大猷題准仍沿
舊制又明時衍聖公有湯沐田大畝八十二頃有奇在順天府屬東安等五縣未詳爲何年所賜 國初

割入旗地七十大頃留下東安縣地十二頃有奇順治十年 詔以山東德魯二藩莊地照數補給此歷代及我 朝頒賜祀田之大凡如此今析而數之凡爲屯者五曰邯城曰鉅野曰平陽曰東阿曰獨山爲廠者四附於各屯而關東阿爲官莊十有八在曲阜者十有二曰張羊莊曰城西大莊曰春亭莊曰紅廟莊曰齊莊曰南池莊曰安基莊曰齊莊坡曰顯孟莊曰馬州坡曰下池屯曰胡二窩在泗水者四曰西廠莊曰安霄莊曰魏莊曰戈山廠在鄒縣者二曰魯源莊曰黃家莊邯城原額屯廠地六百二頃鉅野原額屯地七十六頃獨山原額屯廠地二百二十頃四十三畝六分二釐四毫四絲七忽曲阜原額官莊地六十四頃五十五畝泗水原額官莊地六十二頃八十畝二分七釐五毫五絲三忽鄒縣原額官莊地十一頃二十一畝一分共計五屯四廠及十八官莊原額地共二千大頃但現在地畝統計荒熟鄒城存地三百六十七頃一十五畝五分八釐二毫六絲三忽廠地五十四頃七十二畝五分六釐四毫鉅野存屯地一百八十六頃二十四畝一分七釐廠地三十頃三十畝三分四釐平陽存屯地二百三十一頃一十畝九分四釐一毫七絲廠地十二頃七畝四釐六毫東阿存屯地三十二頃六分一釐四毫七絲獨山存屯地六十一頃七十五畝五分四釐廠地二頃七十四畝七分二釐曲阜十二官莊存地六十頃五十六畝九分五毫四絲四忽泗水四官莊存地五十一頃七十三畝八分一釐三絲鄒縣二官莊存地六頃五

十四畝二分二釐三毫七絲通計五屯四廩十八官莊共現存荒熟地一千九十六頃九十六畝四分五釐八毫四絲七忽較二千原額缺地九百三頃三畝五分四釐一毫五絲三忽此外又有沈河屯地七十三大頃在滋陽袁家莊者五十頃顏村店者二頃故縣村者一頃在撫寧州杏村莊者二十頃卽永樂五年續賜之地有東平廩地大畝二十三頃滋陽廩地二十七頃九十一畝四分七釐曲阜廩地十九頃六畝五分三釐卽順治十年撥補之地又鄒縣有尼山書院祭田一十三頃五十畝曲阜有明洪武初賜五十五代衍聖公地一大頃通前共現存地一千二百五十六頃七十八畝有奇較之 會典所載衍聖公祭田二千一百五十七頃五十畝尙不及十分之六臣按孔繼汾此書以聖裔脫家乘至爲詳盡此闕里文獻考所著衍聖公祭田地產之細數也臣又竊見巡撫張曜奏所稱有基查 會典所載衍聖公祭田二千一百五十七頃五十畝闕里文獻考所載存地一千二百五十六頃七十八畝內有地畝在運河西兩一帶曾爲江南之鹽縣山東之賈莊沁水漫口淹沒沙壓租戶藉口贖欠緣田產散在各縣租戶名姓真僞不一此次清查須先令各縣學官約同公正紳士逐一清查以免舊役下鄉致多弊混俟辦有頭緒再由該管地方官詳加整頓等語嗣又風聞張曜札飭兗沂曹濟道查辦以衍聖公祀田坐落江蘇沛縣缺額二千餘頃曾於同治八年經前兩江總督曾國藩撥補入官每年代徵租價制錢一百四十四千

隨候委員守提此項地畝並未指界亦未造送花戶清冊迄今仍係缺額二千餘頃此次該道查辦旋於十六年閏二月據江南浦縣紳耆同知劉介思等并獨山屯官唐錫鑾以祀田復過造冊繪圖稟請核辦又據江南浦縣銅山縣民劉廷聘張義君等以微山湖涸出無糧地二千餘頃稟傳爲祀田稟請核辦各等情有圖四幅冊十二本並復浦縣祀田碑文二紙該道請咨轉移兩江總督飭查在案該撫以既據有屯官唐錫鑾職員劉介思所稟涸復之地又有銅山縣浦縣民張義君劉廷聘所稟之地二千餘頃無論是否原失祀田擬請欽遵嘉慶十四年戶部具奏奉 上諭著山東巡撫會同東河總督江蘇巡撫嚴飭地方官備查缺額祀田倘歷年久遠難以清查亦卽另籌撥補則於祀田無缺之 恩旨卽在此項地畝內提撥其如何失迷之處已往不究變通籌撥移咨兩江總督江蘇巡撫會同辦理此專據銅山浦縣官紳所稟一帶涸田而言未及具奏該撫旋卽出缺此張曜奏及查辦情形未及遞核之大概也 臣維孔子祭田以及先賢元聖祭田 列聖會典既經載入田賦一門免科田地項下事該戶部現在戶部承管各司自當有坐落地方畝數清冊存卷可查國里文獻考所載順治十年撥補地數以及五屯四廠十八官莊坐落縣分畝數則各該縣自當有免糧地畝數目戶房底冊可查卽令水淹沙壓必有荒廢地段可指抑或隱佔私賣報糧升科各該州縣亦必有先後增益糧戶羨額銀數可稽至於張曜所查銅山浦縣

屯所稟與闕里文獻者所載地段坐落無涉或卽戶部所管免科田地祀田之內或爲衍聖公府後來私
置之田產臣無從細考若據會國藩曾經撥補入官頃又經劉介思唐錫鑾指稟祀田湫出自屬衍聖公
府舊地日久失迷不可知傳聞漸復之後久爲淮陽道屬官紳交相侵噬並匿糧不報事同隱規臣伏
思此項祀田及該府地產先賢元聖各祭田既有官冊私乘及東撫訪查情形和種實據可憑惟有仍懇
天恩俯准臣請飭下戶部兩江總督江蘇巡撫山東巡撫詳細清查按卷調冊妥派幹員隨時辦理其
確爲水淹沙壓荒廢不堪耕種者惟有仍懇 天恩可否遵照 列聖諭旨撥補之例 恩准量數指撥
其有隱佔偷竇報糧升科者一經查明可否 恩准賞還卹入免科田地解典項下免其租稅並飭所屬
各州縣出示曉諭仍令原業地戶認佃承種不爲綠地科罰轉滋紛擾如實在佃種不力仍令於該處就
近另擇居民招認佃種官爲酌辦以復該府祀田地產之舊先賢元聖各祭田附近一處亦一律 恩賜
清理務使實惠均沾不至一家向隅今與封衍聖公孔令貽英年有爲志趣向上俟經此次田產清理之
後亦當勸綜家政恪奉先祀勿得再使府官戶屯任意朦混串通勒扣迷失荒蕪以致上負 朝廷德意
之厚本年八月上丁 皇上親行釋奠典禮臣以署理國子監祭酒躬勦 盛典仰見 兩朝跪獻三獻
揖饗又復添入飲福受胙尊崇 先聖隆禮有加而兩省疆臣坐使其後世子孫祀失業乘虛不備嘗

不繼其無謂也孔子盛德必百世祀公羊家言春秋之義賢者子孫宜有地也臣不揣冒昧重甲前請
又奏臣前曾奏請修復曲阜尼山洙泗兩書院當蒙 恩旨飭下山東巡撫辦理茲經前任撫臣張曜修
葺既成後任撫臣福潤又爲籌款銀一萬兩交與沂曹濟道撥商生息俟積有成數以爲脩脯香火專課
四氏學子弟之資風聞承修官電修兩書院偷工減料房舍尺寸俱行縮小當被罰銀四千兩歸入藩司
未知是否屬實此項後來亦未悉作何開銷請 旨飭下山東巡撫確切查明如果實有此項可否懇

恩賞給併入前項銀一萬兩內一俟交商生息及早添置几案充實學宇使四氏學諸生課讀其中暫歸
現任四氏學學官先行照管免致虛懸無補又重復坍塌一俟官紳籌辦經費稍裕再行酌量葺火延請
山長以圖久遠又奏曲阜衍聖公府自近歲不戒於火舊藏書籍圖錄焚燬一空現在各直省設立書局
以官錢刻書者三十年來珍籍皆本燦然大備除以初印精槧一分解送翰林院敬備 皇上取進御覽
一分解交國子監充備肄業諸生傳習外可否懇 恩飭下各直省督撫有書局者無論新舊諸刻本亦
以一分解交山東巡撫轉行曲阜作爲 恩賜衍聖公孔令貽敬謹儲藏以爲誦法之寶遇有新刻陸續
咨解如直省官紳家刻經籍有願送曲阜衍聖公府者仰體我 皇上嘉惠聖裔有加無已之至意亦卽
聽其就近呈交該省官長咨送山東巡撫彙交孔令貽收存今衍聖公府第既蒙 恩給資重修則書籍

亦宜 賜予成全 上諭翰林院侍讀王勳榮奏請飭盤理衍聖公府地一摺據稱衍聖公府各項地產載在會典事例且關里文獻考頃畝甚詳前次巡撫張曜查出江蘇銅山沛縣一項湖田未及其奏請飭查明撥補等語衍聖公府田產既有官私載籍可憑自無難確切履勘著戶部行知兩江總督江蘇山東各巡撫按照原奏各節調查清冊分晰查清如數撥補據實具奏另片奏請將修葺曲阜聖廟款銀兩發交生思以充四氏學膏火一摺著山東巡撫查明辦理又片奏請飭各省將書局所刻經籍解送衍聖公府儲藏等語卽著山東巡撫咨行各督撫遵照辦理○丁丑以劉樹宣爲河南巡撫那彥圖爲內大臣○賞給京師八旗綠步各營官兵半月錢糧○賞給閒散宗室覺羅人等一月錢糧加賞宗室覺羅孤寡一月錢糧○戊寅河南創建明道書院○以額勒精額爲河南布政使張人駿爲廣東按察使○己卯諭裕祿奏遵查金州失事大概情形請將各員分別懲處並自請議處一摺金州副都統連順雖於賊衆攻城時力戰受傷惟城池被陷咎實難辭著卽革職仍令帶罪圖功以贖前愆提督程之偉救援不力著交部嚴加議處趙懷素前因擁兵不救並有沿途騷擾情事降旨革職著卽拿交刑部治罪協領佟茂蕃赴救遲延著交部議處裕祿身膺疆寄備撫未周亦難辭咎著交部議處餘著照所議辦理該部知道○庚辰命恭親王奕訢爲軍機大臣○以崇歡爲烏里雅蘇臺將軍志威爲烏里雅蘇臺參贊大臣○命廣西

副將王世清馳赴宋慶軍營聽候差委○辛巳諭朕欽奉 慈禧端佑康頤昭豫莊誠壽恭欽獻崇熙皇太后懿旨本年冬至令節次日在廷極殿受賀皇帝親進表文欽此所有應行禮節該衙門敬謹預備○諭內務府奏查明太監辱罵職官按例定擬一摺乾清門首領太監賀進壽革去首領照例杖一百枷號一箇月以示懲儆餘依議○以穆隆阿爲金州副都統○壬午諭軍機大臣等近年各省驛站遞送文件往往遲延實屬廢弛著兵部通行各該督撫等認真整頓所有人夫馬匹當一律精壯遇有一切緊要文報迅速馳送不准稍逾時刻其有軍報經行處所並著酌派馬撥以速郵遞○諭本日奉天府府丞兼學政李培元具奏摺件封簽均未書寫銜名實屬違式著交部議處○實授剛毅爲禮部右侍郎○吉林將軍長順呈進參枝○慶裕奏竊役魚肉鄉民爲害地方請 飭部嚴定罪名得 旨熱河地方自平定後元氣未復何可復容此輩肆行荼毒著嚴密查拿一經審實卽予杖斃毋庸刑部再議○癸未諭禮部奏冬至令節筵宴請旨遵行一摺朕欽奉 慈禧端佑康頤昭豫莊誠壽恭欽獻崇熙皇太后懿旨太和殿筵宴均著停止○甲申諭前經降旨將甘肅寧夏鎮總兵銜汝貴革職拿問交刑部治罪嗣經僅解據報起程迄今尙未解到實屬延玩著盛京將軍直隸總督嚴飭沿途地方官查明行抵何處迅卽押解來京毋任逗遛○諭順天府奏請將知縣撤任察看等語著保定縣知縣黃士杰署永清縣知縣黃陞

增辦理冬撫諸多章率均著卽行撤任交孫家鼎等隨時察看另片奏安平公所等善堂暨興善堂紳捐
賑賑各款援案核獎請飭部立案各等語均著依議○恩溥奏時事艱虞 九重宵旰內宜有樞臣入告
謀猷外宜有臺官直陳得失然言路表率必賴臺端 奴才恭讀道光三十年 文宗顯皇帝諭曰左副都
御史文瑞奏陳四事朕詳加披閱所論剴切真摯深協朕懷並錄進乾隆元年左都御史孫嘉淦三習一
弊疏其論爲君之道洵屬切直精深堪爲聽言臨政之助臺端爲言路表率文瑞首進謫言朕虛懷納受
諫九卿科道斷不緘默畏蒞負朕諄切求言至意也欽此查臺 自祁世長徐致祥履任以後風裁端峻
至今規模肅然惟現任左副都御史奕年已七旬未忘貧鄙把持專擅巧以私心自用於同僚時有忿
爭之事接見科道過有巡城者在坐凡於託己官司必諷示所聞故亂黑白人或不聽必多方措詞報復
曾經巡視東城御史謝錫杭面駁其非不知愧悟又司坊官每月堂參之期人各耳語許久顯有授意繁
私之事似此襄領臺綱何以振清風而勝表率尤有奇者 奴才等在衙門應得銀銀向山京畿道公分致
送頃見其單內有扣送奕年分資一項詳請之始知其侍姬病故夫以言官挾結聚長其人之骨氣已不
足言敝衆實以媚其妾媵之流有此京畿道御史乎臺班如此更糾何人所有副都御史奕年應請 旨
立予罷斥並 飭下都察院堂官將主持扣資之御史查取職名從嚴參辦倘該堂官意存迴護曲爲推

脫別經臣工參奏定將該堂官一併懲處以洗臺班之玷出自 宸裁 上諭御史恩溥奏都察院左副都御史奕年把持專擅私心自用於同僚時有忿爭接見科道遇有巡城者在坐必諷示所聞故亂黑白每月堂參之期與司坊官耳語許久顯係授意營私京畿道御史沈炯奕年於該衙門餉銀內扣送分資請飭查辦等語著派徐桐榮祿按照原參各節確切查明據實覆奏毋稍徇隱○乙酉 上詣 泰先殿壽皇殿行禮○諭提督聶士成等於前月二十九日在奉天督軍攻剿倭寇獲勝奪回連山關要隘陣斃倭酋富爾三造殄賊甚多業經頒給聶士成呂本元賞件並賞給軍士銀兩茲復據裕祿奏本月初九日倭人復由分水嶺來撲聶士成商令呂本元孫顯買耿鳳鳴諸軍並督同夏青球等分路扼守初十日早間該提督等分挑奮勇千餘人搶占分水嶺敵眾越嶺而逃官軍追殺至草河口鎗斃數千人餘向兩山奔走該將弁等耐寒苦戰奮勉可嘉所有此次出力將弁人等著裕祿保獎以示鼓勵○諭軍機大臣等慶裕奏統籌熱河全局一摺據稱熱河地方自教匪剿滅後防營不敷分布道府州縣並無自然之利不敷辦公擬添募馬勇四五百名並籌給地方官津貼每年需款五六萬兩該將軍前在福建藩司任內稔知閩海關洋稅每年協撥各省餉項一百餘萬兩請於協餉內每年抽撥五六萬兩協濟熱河作為招募津貼兩項之用等語該將軍所籌係為整頓吏治保衛地方起見卽著慶裕於到任後體察情形所有

閩海關洋稅每年協餉項下是否可以抽撥之處再行奏明請旨辦理將此諭令知之○丙戌諭軍機大臣等據裕祿唐仁廉電奏奉天軍務喫緊聞天津新城西沽軍械庫所存七八九生脫克鹿卜礮尙可撥數十尊如不能撥查吳大澂曾在北洋購備此礮現可撥二十四尊又天津新兵練軍礮隊可撥克鹿卜九生行礮十尊大沽礮隊可撥六尊天津水師營可撥十尊山海關可撥四尊請飭如數撥給等語現在天津軍局有無此項礮位能否酌量勻撥著李鴻章迅即查明復奏○諭兵部等奏遵議處分一摺福建陸路提督程之偉協領茂蔭均著照部議卽行革職留營効力以觀後效盛京將軍裕祿著照部議降二級留任不准抵銷○電 諭李鴻章飭查朱慶所募新勇現已到幾營李永芳五營聞已到津著迅催到防○戊子日人取我析木城○以程文炳爲福建陸路提督○己丑日人取我海城縣○諭軍機大臣等北洋軍械待用甚亟張之洞昨請留前購鎗械已降旨申飭未經允准並令迅催運解○以阿克丹署戶部右侍郎○庚寅諭李鴻章奏特參捕務廢弛之知縣請旨嚴懲等語直隸寧津縣施王大虎莊臧家莊大柳鎮王家廟等處七月間連出劫案四起迄今僅獲盜犯一名捕務實屬廢弛寧津縣知縣趙欽舜著交部照例分案議處仍飭嚴緝各案賊賊務獲究辦餘著照所請辦理該部知道○諭本年各省住京人數衆多現在又屆天寒難保無奸匪潛跡藉端滋事所有各國使館教堂處所著步軍統領衙門遴派營

員帶領兵役彈壓巡緝認真保護如有匪徒滋擾立即嚴拿懲辦毋得稍涉私縱以靖奸宄而篤邦交○辛卯命步軍統領榮祿在總理各國事務衙門行走○壬辰諭軍機大臣等戶部總理各國事務衙門奏撥撥東北邊防經費一摺照案指撥閩海關六成洋稅十萬兩著於來年五月前批解一半年內全數解清毋稍遲延○諭副都統盟陞阿記名提督聶桂林前因臨敵退縮降旨革職茲在析木城遇敵又復潰退著即拿交刑部治罪○諭慶親王奕劻奏因病請續假並請開去御前大臣領侍衛內大臣掌衛事大臣各差一摺慶親王奕劻著賞假十日毋庸開去差使○以全濟告竣予倉場侍郎祥麟等優敘有差○癸巳諭宋慶奏遵旨查辦統將被參各節據實覆陳一摺已革甘肅翼宸鎮總兵衛汝貴平時待兵寡恩此次赴朝鮮援剿不能約束弁勇縱令到處騷擾以致民人怨謗相和罪狀實爲僨事之尤衛汝貴業經降旨革職拿問著李鴻章裕祿懷遵迭次諭旨查明該革員行抵何處嚴飭押解員役迅速解交刑部治罪毋許逗遛已革直隸提督葉志超由公州退回平壤並未接仗沿途所報戰狀盡係虛捏迫行抵平壤又復漫無布置即行潰退其時安州尙有馬步八營可爲策應該革員並不扼守安州乃竟退過鴨綠江實屬統馭無方大員委任海軍提督丁汝昌統領海軍多年自倭人肇釁以來迭經諭令統帶師船出海援剿該革員畏葸遲延節節貽誤旅順船塢是其專責復不能率師援救實屬愆怯無能罪無可追葉志

趙丁汝昌均著拿交刑部分別治罪○諭裕祿奏查明官軍退出岫巖情形據實覆陳一摺已革副都統
豐陞阿已革提督蘇桂林昨因在析木城禦敵又復潰退降有將該革員等拿交刑部治罪茲據裕祿奏
稱十月十九至二十一等日倭兵迭撲岫巖州城豐陞阿蘇桂林等自應督隊堵剿乃遽退出岫巖至龍
鼻峪一帶竟置州城於不顧實堪痛恨著刑部歸入前案一併按律定擬具奏守備周鼎甲參將金得鳳
張占魁接仗不力均著先行革職金得鳳張占魁並著撤銷勇號仍責令該三員隨營効力以觀後效餘
著照所議辦理該部知道○李鴻章奏准總理衙門十一月初一日電開本日奉 旨有人奏旅順未失
以前總辦道員龔照璵潛逃回津聲稱旅順失守擅離職守搖惑人心等語龔照璵在旅順是否專辦船
局抑有別項差使如果有潛逃惑眾等情著李鴻章據實參奏勿稍徇隱欽此 臣查龔照璵本係委辦旅
順船塢局工程兼辦水陸營務處常年多駐旅順十月初九日倭賊攻陷金州龔照璵以旅順側紮兵單
來津請救其時宋慶已率隊南下 臣又奏調章高元一軍北渡會合往援復派鎮東輪船裝運子藥糧米
前往接濟當飭該員卽日回防激勵諸將同心固守是該員來津之日旅順尙無賊蹤至十七日賊始分
道來攻則該員已先回旅順是以十七八九等日接仗及二十一日旅軍獲勝各情形均據龔照璵電報
經臣轉達總理衙門代奏在案二十四日旅順不守二十五日該員猶同各軍戰退至小平島二十六日

始至煙臺前後皆有時日可稽並無事前潛逃揚言惑衆情事該員本是文職既與帶兵不同兼辦局差亦非守土可比惟係管理船局之員船塢失陷自有應得之咎應請旨將直隸候補道龔照璵即行革職以示懲儆該員在北洋辦理機器製造逾二十年深得西法奧妙一時無出其右合無仰懇天恩俯准留營効力以資驅策臣爲人才難得起見是否有當理合據實覆陳上諭前因旅順失守諭令李鴻章查明總辦船局道員龔照璵有無潛逃惑衆情事茲據李鴻章覆奏請將龔照璵革職留營効力當經革職不准留營惟該革員總辦船局工程兼辦水陸營務久駐旅順當倭氛逼近之時不能聯絡諸軍同心固守迫船塢失陷逃至煙臺僅予革職不足蔽辜已革道員龔照璵著即拿交刑部治罪其分統各軍駐守旅順之記名提督衛汝成黃仕林雲南臨元鎮總兵姜桂題記名總兵程允和至今尙無下落著李鴻章查明迅速覆奏其懷業前已革職拿交刑部治罪該革員現在何處著速即查拿交部○甲午諭崑岡等奏請簡員署理對引大臣一摺福錕現在請假所充對引大臣著派熙敬署理此次該衙門咨取堂銜開單請簡何以祇有四員嗣後各項差使凡有應行簡派人員均著全行開列以杜規避○賜錕國將軍載銘之子名溥倅○以閔殿魁爲四川建昌鎮總兵○賞西城資善堂煖廠米石○乙未日人取我復州○丙申諭軍機大臣等裕祿唐仁雁電稱海城既失而宜北保遼瀋南顧營口此路無險可扼須設營

疊砲臺吳大澂新購德國大砲一百二十尊已抵關者二十二尊請飭派十三生脫十二尊十八生脫二尊派弁隨帶砲手藥彈限八晝夜解至瀋陽以救危急等語奉省需用洋砲吳大澂處如能撥給著卽迅速解往倘無可分撥著李鴻章設法酌量撥給○丁酉大祀 天於 圖丘 上親詣行禮○戊戌諭軍機大臣等李鴻章奏慶電奏均悉連日海城接戰傷亡甚衆宋慶率隊回紮田莊臺並據袁世凱報牛莊已失覽奏殊深憤懣刻下賊蹤已至牛莊營口甚爲緊急宋慶一軍現紮田莊臺亟應整頓隊伍激勵將士力遏西竄之路章高元徐邦道等扼守蓋平已爲日兵所隔能否調令截擊牛莊一股與宋慶兩面合剿著卽妥爲調度姜桂題程允和張光前等已明降諭旨革職留營仍責令帶罪圖功以觀後效現據長順電奏遼陽亦甚危急陳提一軍現已出關卽著宋慶知照該臬司徑赴瀋陽與長順商同防剿毋稍疏虞○以李鴻章爲雲南臨元鎮總兵○命戶部左侍郎張蔭桓署湖南巡撫邵友濂前往日本會議和局○李鴻章電致總理各國事務衙門宋提督二十四亥刻田莊臺電頃姜桂題程允和到營稟解該鎮等於十月二十四在旅與倭交戰殺傷甚多因無後援不能抵敵隊伍被賊擊散退過龍王廟倭兵退後零星分竄該鎮復向南擊殺其零賊又有大股猝至仍被衝散馬皆被倭碾斃程允和腿被壓傷姜桂題不忍獨去相與扶持步行過廟僧援救又因復州阻賊轉輾繞折今始到營自知罪重仰求參辦等語該鎮

二十三到營正值賊來攻我與宋得勝等合力戰剿甚爲出力可否留營立功自贖之處乞鈞裁轉奏云
鴻查姜桂題程允和向稱打仗奮勇派令各統四營嚴守旅順後路倭衆攻旅數日屢有殺傷旅陷後其
部勇潰退至宋慶處已飭馬玉崑代爲收集今轉輾脫出復與宋得勝等戰剿出力可否將臨元鎮總兵
姜桂題記名提督程允和暫行革職留營立功自贖以觀後效又派守旅順西岸礮臺之記名總兵張光
前於十月二十三四日分隊擊賊詎賊由間道後路包抄力戰不勝潰圍出至宋慶金州營內宋慶旋電
奏令其收集慶軍潰勇四營兩哨派令會同章高元徐邦道等扼守蓋平現當金復來路之衝可否懇

恩一併革職留營立功自贖伏候 聖裁乞代奏 上諭李鴻章奏據宋慶電稱總兵姜桂題程允和在

旅順與倭接戰失利輾轉繞赴宋慶軍營與宋得勝等合力戰剿甚爲出力可否留營立功自贖總兵張
光前亦因力戰不支至宋慶軍營內會同章高元等扼守蓋平可否一併革職留營等語旅順失守姜桂
題等罪有應得姑念此次會同扼守尙能出力雲南臨元鎮總兵姜桂題記名總兵程允和張光前著一
併革職准其暫留宋慶軍營帶罪圖功以觀後效倘再不知愧奮定按軍法從事○己亥 上諭 肅
殿進表文御中和殿受禮太和殿受賀○李鴻章電致總理各國事務衙門督辦軍務處丁汝昌電美員
宴汝德函云一伊所呈水戰防口各款如試驗有效我國用伊卽給美金洋一萬元不得食言一試驗應

需各料件均由我國備辦一試驗後如不用伊在場親見之人須秘密其事不得將所陳各法告人並私用於國家及私用於自己一此次約須遵守辦理不得作為廢紙屬即簽押等語查試驗有效即須付金洋應如何兌付且伊須簽押後方肯繪圖並開單購料昌未敢擅便謹請電商督辦軍務處准否簽押候示遵行云應否准其簽押如試驗有效應飭糧臺照付候示遵 上諭軍機大臣等李鴻章電悉美員宴汝德所陳水戰防口各款如試驗有效即須付給定銀等語此事總以效驗為憑究竟以何船試驗若以敵船為驗則必須出海攻戰若用華船則斷無自行擊沈之理其餘各法如何取效並著詳晰詢問速條覆奏○李鴻章電致總理各國事務衙門丁汝昌有電兩美員來催簽押云如用伊即請簽押否則回信伊作別圖等語乞示遵辦云祈速核 上諭軍機大臣等李鴻章電悉兩美員著即與簽押以便試驗○李鴻章電致總理各國事務衙門威海衛統將戴宗騫張文宣劉超佩等公電恭讀 上諭速治丁提督九重嚴命何敢瀆陳惟是威防現甚喫緊倭船常來窺伺地隔兵單時虞頃越丁提督自旅回防後日夜訓練師船聯絡各軍請求戰守布置一切正仗籌畫若遽進京軍民不免失望竊等惟有籲懇憲恩設法挽回 天意暫留丁提督在威協禦要防大局幸甚臨稟不勝迫切待命之至又海軍左翼總兵劉步蟾暨各管帶等公電丁提督表率水軍聯絡早籌布置威海水陸一切衆心推服今奉速治 嚴旨不

獨水師失所乘承卽陸營亦乏人聯絡且軍中各洋將亦均解體當此威防喫緊之際大局攸關會懇憲恩設法挽回 成命暫留本任竭力自贖以固海軍根本之地而免洋將渙散之心實爲深幸迫切籲禱伏乞格外成全等語事關要防大局不敢殫於 上聞候裁奪 上諭軍機大臣等李鴻章電據載宗燾等稟請暫留丁汝昌辦理防務等語丁汝昌著仍遵前旨俟經手事件完竣卽行起解不得再行演請○王寅諭前據御史恩溥奏參都察院左副都御史奕年把持專擅各款當派徐桐榮祿確查茲據查明奕年被參把持專擅故亂黑白及與司坊官耳語等情均無實據惟於酌選筆帖式差缺未經公商輒派資格在後之人致屬員據呈申訴雖無隱徇情事究屬辦理失當又於伊妾病故出具報單稱謂失體亦有不合奕年著交部議處餘依議該衙門知道○命恭親王翁同龢李鴻藻徐用儀剛毅充方略館總裁○奉天府府尹福裕因病乞休不允予假一月調理○是月荷蘭國使臣費果孫回國由德意志國使臣紳珂代理使事

十二月癸卯朔諭前因旅順失守當經降旨將丁汝昌開革交刑部治罪並飭李鴻章查明衛汝成黃仕林等下落嗣尙未據覆奏茲據李秉衡奏稱丁汝昌開革衛汝成臨敵逃竄貽誤軍機請明正典刑以伸國法等語記名提督衛汝成於赴援旅順時沿途縱勇殃民旅順失守聞風先遁實屬罪無可追

著卽革職拿交刑部治罪李鴻章迅卽派員起解不准稍涉延緩記名提督黃仕林仍著李鴻章查明下落迅速覆奏○諭現在軍務未平從征將士冒鋒衝鋒備嘗艱苦烽煙所至民生不得安樂朕宵旰焦勞時深軫念所有本年十二月二十三日紫光閣筵宴除夕太和殿筵宴及明年正月內一切筵宴均著停止該衙門知道○諭本年恭逢 慈禧端佑康頤昭豫莊誠壽恭欽獻崇熙皇太后六旬萬壽普天同慶隨班祝 嘏之已革鎮國公溥泰等四百九員五品以上者均著照原官解二等賞給職銜六品以下者均著賞還原銜休致之翰林院編修尹琳基等各員均著賞還原銜其已有職銜之已革金州副都統毓福等四十六員均著加級該衙門知道單三件併發○予陣亡侍衛永山祭葬世職入祀昭忠祠並附祀伊父富昆阿黑龍江專祠戰功事蹟交國史館立傳○依克唐阿奏奴才奉命征倭先後與賊接仗均各隨時電報總署及督辦軍務處代奏在案惟其中傷亡將士臨時未得悉詳接仗情形所報或有詳略邇計數月以來大小十餘仗傷亡數千人除將收復甯石河擊敗長山子岔路口草河城等處鉅股竄賊已經詳陳不計外所有草河嶺以後血戰及死事情形不得不爲 聖主縷陳之方草河嶺之戰也我軍因山路崎嶇三面受敵該步隊統領營官等繞山越澗披荆力戰而馬隊統領永山亦令各將士下馬步行分道猛進彼此鎗礮環施子如雨注數十里外皆云聲震山谷如迅飈疾發終日不止惟時奴才親登山

頭指揮將士見壽山永山在南路山脊衝鋒陷陣戈什哈傷亡幾盡猶統率所部猛攻富保德恆恩海等俱各奮力直前廖源帶隊爭搶賊礮傷勇四名親見我軍礮斃賊目二名隨獲賊帽搶得漢字名片二紙一曰帶第一等軍曹稍井簾太郎一曰第五師將軍第十二隊坂井回次郎此十月二十八日草河嶺血戰終日之情形也自是以後兩軍連日我軍晝夜相持不休至十一月初三日午刻與東寧之賊在關道口獲一勝仗卽卻回時探報獲馬集各處喫緊先派步隊一營守北分水嶺要隘以塞賊衝方擬力攻草河口與聶士成聯絡詎初四日賊以三四人翻山撲我行營隨又添來千餘人抄我後路是以有崔家房之失幸初六七八等日新軍繼到四營聲勢稍旺獲馬集之賊晝夜潛逃起卽會商聶士成合力夾攻十三日同抵同達堡十四日接仗而該軍僅以馬隊二百餘人順大道且戰且退奴才所部之兵力戰終日至暮該軍步隊趕到已無及矣是日奴才幾不能軍猶暫紮林東溝收拾殘隊聶士成亦退至奴才軍後此金家河失事之所由來也先是初十日統領壽山永山率步隊營官恆玉廖源長寶壽慶德各營馬隊營官崇玉金德各營由崔家房白水寺謝家堡轉戰而前十五日在四棵樹大獲一勝十六日統領扎克丹布德英阿等營趕到會同攻克龍灣跟蹤進剿遂抵草河北岸距鳳凰城八里十七日乘勝渡河至法家嶺底十八日內薄鳳凰城恆玉率其所部攻入東門已就得手詎城內伏兵突起城外援賊大至將

我軍四十餘名截斷城內悉沒於陣統領三等侍衛永山身先士卒率隊策應連受鎗傷洞胸陣亡兵力不支傷亡幾半幸經壽山等各營分投往援賊始稍卻我軍亦即收隊時值復州海城相繼失守遼陽南路軍事喫緊於是撤回分水嶺下馬塘一帶扼紮聯絡大高嶺各軍兼顧遼東門戶此永山等連日苦戰死事慘烈之實在情形也查奴才所部始以鎮邊馬步八營三獲勝仗自添新軍步隊三營而岔路子草河城草河嶺關道口崔家房各戰俱極爲得力其後陸續所到七營未及休息連經十一月十二日總督札到電旨擊賊潰歸卽分兩路進攻該新舊各營日夜從事於礮火風雪之中莫不踴躍用命奮滅倭寇不意兵分勢弱寡不敵衆以至兩路皆挫未能制勝奴才咎固難辭惟在事出力統領營哨各官兵勇等大小十數戰僅挫三次餘皆獲勝先後斃賊二千餘名不無微勞足錄其陣亡官兵勇等尤屬爲國捐軀深堪憫惻合無籲懇 天恩 垂念將士准其從優獎卹以示鼓勵而慰忠魂之處出自 逾格鴻慈又奏哨官景奇恩壽福成前因臨陣脫逃咨行查拿至今未獲相應請 旨敕下盛京將軍嚴拿務獲送交軍前正法以儆效尤而肅軍紀 上諭依克唐阿奏請將打仗出力及傷亡員弁兵勇議卹一摺依議唐阿所部各軍自十月二十八日以後在草河嶺等處迭次與倭人接仗先後斃賊二千餘名尙屬奮勉出力其陣亡官兵勇爲國捐軀殊堪憫惻卽著依克唐阿查明請旨分別獎卹另片奏請將臨陣脫逃

之哨官拿辦等語哨官景奇恩昌福成著盛京吉林各將軍一併嚴拿解交依克唐阿等營卽行正法以肅軍紀該部知道○甲辰諭軍機大臣等前據李鴻章電奏葉志超一軍在成歡等處地方接仗獲勝當經明降諭旨將出力各員分別獎敘現在疊次有人奏參該軍捏報勝仗所保各員且有併未在營者宋慶雲奏摺內亦云葉志超由公州退回平壤所報戰狀盡係虛捏第念諸士成等同時力戰亦未便沒其微勞著宋慶雲將葉志超前次請獎之案確切查明其實在出力各員仍准給獎外其餘倖邀獎敘之員著卽奏明請旨撤銷以昭核實李鴻章原電著鈔給閱看將此諭令知之○諭御史易俊奏河南請停分發應俟軍務告竣再行辦理等語著吏部議奏○命兩江總督劉坤一爲欽差大臣關內外防剿各軍均歸節制○命太僕寺卿岑春暄馳赴劉坤一軍營聽候差遣○安維峻奏李鴻章平日挾外洋以自重今當倭賊犯順自恐寄頓倭國之私財付之東流其不欲戰固係隱情及 詔有嚴切一意主戰大拂李鴻章之心於是倒行逆施接濟倭賊煤米軍火日夜望倭賊之來以實其言而於我軍前敵糧餉火器則有意勒扣之有言戰者勸遭呵斥聞敗則喜聞勝則怒准軍將領望風希旨未見賊先退避偶遇賊卽驚潰李鴻章之喪心病狂九卿科道亦屢言之臣不復贅陳惟葉志超衛汝貴均以革職拿問之人藏匿天津以節署爲進逃數人言嘖嘖恐非無因而於拿問之丁汝昌竟敢代爲乞 恩並謂美國人有霧氣者必須

丁汝昌駕馭此等怪誕不經之說竟敢直陳於君父之前是以朝廷爲兒戲也而樞臣中竟無人敢爲爭論者良由樞臣暮氣已深過勞則神昏如在雲霧之中霧氣之說入而俱化故不覺其非耳張蔭桓邵友濂爲全權大臣尙未明奉諭旨有在樞臣亦明知和議之舉不可對人言既不能以生死爭復不能以利害爭只得爲掩耳盜鈴之事而不知通國之人早已皆知也倭賊與邵友濂有隙竟敢索派李鴻章之子李經方爲全權大臣尙復成何國體李經方乃倭逆之婿以張邦昌自命臣前已劾之若令此等悖逆之人前往適中倭之計倭賊之議和誘我也彼既外強中乾我不能激勵將士決計一戰而乃俯首聽命於倭賊然則此舉非議和也直納款耳不但誤國而且賣國中外臣民無不切齒痛恨欲食李鴻章之肉而又謂和議出自皇太后太監李連英實左右之此等市井之談臣未敢深信何者皇太后既歸政皇上若仍遇事牽制將何以上對祖宗下對天下臣民至李連英是何人斯敢干政事乎如果屬實律以祖宗法制李連英豈復可容惟是朝廷受李鴻章悞喝不及詳審而樞臣中或係私黨甘心左袒或恐李鴻章反叛姑事調停而不知李鴻章久有不臣之心非不敢反直不能反彼之准軍將領類皆貪利小人絕無伎倆其士卒橫被剋扣皆已離心離德曹克忠天津新募之卒制李鴻章有餘此其不能反之實在情形也若能反則早反矣既不能反而猶事事挾制朝廷抗違諭旨彼其心目中不復

知有我 皇上並不復知有我 皇太后故敢以霧氣之說戲侮之也 臣實恥之 臣實痛之 惟冀 皇上赫然震怒明正李鴻章跋扈之罪布告天下如是而將士有不奮興倭賊有不破滅者即請斬臣以正其妄言之罪 祖宗鑒臨 臣實不懼用是披肝膽冒斧鑕痛哭直陳不勝迫切待命之至 上諭近因時事多艱凡遇言官論奏無不虛衷容納卽或措詞失當亦不加以譴責其有軍國緊要事件必仰承 皇太后懿訓遵行此皆朕恪恭求治之誠心天下臣民早應共諒乃本日御史安維峻呈進封奏託諸傳聞竟有 皇太后遇事牽制何以對 祖 宗天下之語肆口妄言毫無忌憚若不嚴行懲辦恐開離間之端安維峻著卽革職發往軍臺効力贖罪以示儆戒原摺著擲還再向來聯銜封奏必有言責者方准列名此外部院各官均由堂官代奏乃近來竟有一二人領銜糾集不應具摺之員至數十人之多殊乖定制以後再有似此呈遞者定將列名之員概行懲處○乙巳調長麟爲戶部右侍郎轉剛毅爲禮部左侍郎以溥善爲禮部右侍郎○丙午劉坤一奏本月初二日內閣奉 上諭兩江總督劉坤一著授爲欽差大臣所有關內外防剿各軍均歸節制欽此 臣久忝兼圻渥承 寵眷方愧涓埃未報有負 朝廷知遇之恩當此時事艱難倭氛猖獗正宜力圖報稱上紓 宵旰憂慮何敢有意畏難稍存諉卸惟念 臣區區微衷有不能不爲 皇上敬陳者以 臣生長湖湘自効力行間及服官各省均在大江以南於東北一切情

形非所素悉況現在關內外各統將多不相習且或係將軍巡撫或奉 命幫辦未便由臣節制加以衰老之軀粹腐艱鉅萬一貽誤關繫非輕再四思維惟有仰懇 恩施開去欽差大臣差使臣雖力薄斷不敢稍圖安逸擬請 旨將臣交督辦軍務處隨同恭親王辦理軍務抑或指撥湘軍二三十營歸臣統帶馳赴前敵當一路之師臣務當竭盡忱勉酬 高厚 上諭劉坤一奏籲懇收回成命一摺現值軍務緊要統帥需人劉坤一從前帶兵多年威望素著是以特授為欽差大臣該督惟當仰體朝廷眷顧之意盡心辦理以副委任毋得因辭各營將弁如有不遵調遣不受約束者即按軍法從事以一事權○丁未上詣 奉先殿 壽皇殿行禮○諭軍機大臣等宋慶電奏南股倭賊向岫巖竄去照岳之股入山東趨恐由岫巖北犯等語現在賊股東趨其大股在學蘭店尙無動靜詭謀難測本日據依克唐阿電稱親率馬步前往遼陽會合長順堵剿兵力較厚和紆東顧之憂惟倭逆踞守海城正當遼陽牛莊之間我軍東西中梗難以聯合宋慶擬探南路之賊如已遠去督軍規取海城該提督酌度情形妥慎籌辦勿墮詭謀而誤戎機宋得勝腿肘鎗傷曾否平復著即覆奏葉志超業經拿問該革員現在何處著宋慶即行查明派員押解來京勿任逗遛所有關外敗退淮軍先後收集共計若干營此等餉事之兵難期得力著宋慶認真挑選分別撤散以節餉需○諭御史鍾德祥奏內務府破庫郎中岳齡承修宮中錫背臂請銀

七萬餘兩銀庫郎中繼祿挪移銀兩以萬數計交各司處索取利息與外郎趙曾請領修工款項勒扣侵蝕聞皆由總管內務府大臣文琳前在郎中任內浮冒侵欺以致相沿成習等語著派薛允升剛毅按照原參各節確切查明據實具奏毋稍徇隱○諭步軍統領衙門奏遵保左右兩翼獲盜出力員弁懇恩獎勵各一摺均著該部議奏○諭御史鍾德祥奏內倉有支放太監老米一項近來放米之日時有太監向領僅滋開其弊由太監先有私借價項扣抵糧餉或因銀米短折等情著總管內務府大臣確切查明按照定章核實辦理以杜弊端○戊申諭前據長順奏釋回太監董雙福等驢擾驛站當經諭令恩澤飭沿途各站按名查拿解交慎刑司嚴訊懲治茲復據增祺奏稱董雙福等於伯都訥以上各站勒索商民多慮請旨懲辦等語釋回太監竟敢沿途騷擾勒索實屬目無法紀著內務府查明該太監等如已解到即飭慎刑司嚴訊從重懲治倘未到京即咨行經過省分儘令迅速解送毋任在途逗遛黑龍江解差官騎騎校巴彥珠拉雲騎尉玉慶於該太監等沿途滋事既未能隨時彈壓又不即行稟報雖據供無分錢放縱情事究屬不合巴彥珠拉玉慶均著交部議處○諭吏部奏遵議處分一摺都察院左副都御史奕年著照部議降二級留任並罰俸九箇月均著不准抵銷○己酉 上御中和殿閱跳步扎○諭軍機大臣等增祺奏依克唐阿需用軍火黑龍江所存不敷撥給除現撥子彈十七萬顆外請由天津山東各機器

局辦解應用等語著李鴻章李秉衡各就該省局酌量情形先行籌撥子彈若干迅速解濟仍由增祺飭令機器局趕造續解俾源源接濟無誤要需○庚戌諭李鴻章奏遵查旅順失守各將領中黃仕林落水救出趙懷業衛汝成一員尙無下落等語記名提督黃仕林失守礮臺著革職拿交刑部治罪趙懷業衛汝成仍著嚴密查拿迅速解部毋任避匿○辛亥諭御史恩順等奏匪徒糾眾搶劫已獲人犯請旨嚴拿懲辦一摺據稱中城兵馬司吏目印廷榮詳稱准宗人府咨送松常氏呈告宗室長佑等案內應將沈錫龍卽沈四王德元嚴傳遵卽拿獲沈錫龍送至官廳看守忽來多人持械將沈錫龍搶走等語聲轂之下竟敢將已獲人犯於官廳糾眾持械搶劫實屬目無法紀著步軍統領衙門順天府五城御史將沈錫龍及搶奪各犯一體嚴拿務獲送交刑部按律懲辦○孔祥霖奏臣科考事竣課試兩湖書院據院中肄業湖北優貢生王葆心等湖南廩生蔣鑫等合詞呈請我朝重道崇儒凡有功望教未嘗附驥文廟者歷經奏准從祀而學行純備博大淵微如衡陽王夫之不登兩廡實爲缺典竊維聖道重於德明永張獻忠陷衡州執夫之父爲質以招之不往則失父往則失身乃刺傷肢體昇往示不可用置其兄介之以死告乃並得免大清定鼎鄭端嘯郡守饒聚鼎致意夫之以病辭吳三桂僞號有以勸進表屬夫之君夫之逃去忠孝友悌避世不悔其德行純全也如此儒生之習或務考據而略義理或談性命而鮮敷施夫

之辨易圖之繫排緯書之考名物訓詁音韻以正詩集傳之疏修時享儀節以補三禮之缺皆爲後儒
導厥先路其尤邃者如大學衍中庸衍則宗朱子而黜吳說周易內外傳則斥附會而演真銓讀四書大
傳說有申集註者有補集註者則極深研幾以求合乎孔孟之道至其註禮記數十萬言幽以究民物之
同原顯以綱維萬事又經世之書也當時與黃宗羲顧炎武同以經學開風氣之先而夫之所著尤多且
粹其學問賅備也如此與宋道學濂洛關閩易世同稱從周程朱游者類多升主配食彬彬一堂獨張子
弟子既鮮赫著私淑又曠代無人夫之乃能遠紹絕業注正數數萬言發明張子論仁之旨以明人倫以
察庶物而合於西銘所謂同胞同與者八百餘年繼橫渠者夫之一人而已用是學有本原行無缺憾可
不謂博大淵微者歟夫之著述凡四百餘卷康熙末潘宗洛僅得數種上之史館乾隆中 四庫館開其
易書詩春秋稗疏已荷著錄尙書引義春秋家說并列存目惜地處僻遠簡編散佚無人博採以呈其精
者館臣固未盡見也然提要已備其言易不信陳搏之學京房之術於先天諸圖及緯書雜說排斥其力
亦不空談元妙附會老莊故言必徵實義必切理其說書說詩辨叶韻諸書亦咸推精確紬慶初 國史
創立儒林傳夫之獲立專傳而從祀缺如光緒初元曾經郭嵩燾奏請部臣據前人序船山書有著述太
繁純駁互見之語爲駁今案 四庫全書惟春秋稗疏一種館臣稱其得失互見然語皆有本則亦未足

爲夫之之累也

國朝先儒如孫奇逢陸隴其陸世儀等著錄四庫之書亦多糾正之處禮臣知其無

礙大醇故均不廢其從祀況夫之所著尙多精於已著錄及存目者乎生等居接鄉閭身爲教澤知

國家祀典不能不慎重於初而賢哲遺風不敢不表揚於後下採輿論上陳 天聰等因臣查王夫之籍

隸衡陽爲前明舉人隱居石船山著書終老其學行積久而成定論誠有如該生等所呈者其人其書既

經 列聖褒嘉矣而乾嘉以來碩儒名臣類有論贊段廷樞其集漢宋之大成唐鑑作 國朝學案列

入震道鄧顯鶴序刊遺書稱其學以漢儒爲門戶以宋五子爲堂奧論精卓踐履篤實粹然一軌於正

曾國荃增刊遺書其兄國藩序稱深闕固蔽以求所謂育物之仁經邦之禮窮探極論千變而不離其宗

至於吳廷棟以正學受 文宗顯皇帝之知與夫之尤有默契神其遺書有曰先生追蹤橫渠而深契程

朱心源每因一事一言隱探道要人讀其通鑑論或疑其偏祖矣卽謂其借古以抒忠憤亦猶漢也非得

程朱心源不能折衷其用意離合也是天之見推於時賢又極其至也臣恭查累次奏定章程凡請從祀

者必以闡明聖學傳授道統學術精純經綸卓越爲斷考夫之學本張載張氏以易爲宗正氣一貫皆補

闡太極圖說天人相契之理假使僭從者衆其教大昌童蒙之志皆正於初彼陽儒陰釋之說必不能乘

間而張其幟惜張子瞻居獨處莫爲羽翼其書又詞奧義微求學未易窺其涯涘故道不甚顯後有賢知

之過者遂別立宗旨而聚實逐虛之弊興至明季極矣追我 聖祖仁皇帝御纂性理精義謂西銘一書
乃有宋理學之宗祖與周子書並立篇首而理一分殊之旨乃如日中天若夫之書當學術龐雜之餘獨
守學以待來者其功不在唐韓愈元道復下觀其注釋正蒙與思問錄內外篇凡張子引而未發之義皆
疏通證明使學者有所折衷闕學之傳此其嫡派乎其他羣經子史皆有能述而於曲學邪說絲毫未假
雖其激揚務盡或有詞鋒峻厲不免招異議者之忌然而衍道之意廣救世之心苦矣此其闡明聖學傳
授道統確有可證者也夫之身丁京運尤憤從王凡有規畫動關興亡大計督師何騰蛟堵允錫不相能
夫之上書章疏請和兩軍以防潰變弗聽卒致覆敗有料事之明三劾王化澄引救忠直瀕死不顧有敢
言之勇及事不可爲退游郴永遷邵岡人士慕從者衆夫之輒辭去有勸人之誠至所著史論其上下古
今之識指陳歷代之興衰治亂嚴聲擗斥驚搜深切著明使讀者悚然引爲法戒更以之師千百世而有
餘是以咸同之際中興將帥半湘省儒生其得力夫之遺著者居多蓋夫之知明社之屋前由武備之廢
弛後由兵謀之未嫻故於歷代兵事辨之綦詳湘人服膺其書多明將略出興戎機遂能削平大難以是
朱迥然創立船山書院講明夫之之學彭玉麟踵事改建自稱親讀其書私淑其人而後閩風興起正未
有艾是夫之固前明之遺老亦我 朝之功臣此其學術精純經綸卓越又有明驗者也今者海疆有事

異教潛興補救之方惟在培養人材出膺鉅鉅則獎真儒而昭崇報使天下咸曉然於聖學之體用固有如是之兼賅者以正人心以扶士氣當今急務無過於此既據該紳等合詞具奏前來伏念夫之學行實足上接真傳有資實用潛德幽光不容終闕通鈔錄原呈擬請 飭部核議可否以遺儒王夫之從祀

文廟伏候 聖裁下禮部議奏○癸丑命廖壽恆署戶部左侍郎○甲寅諭軍機大臣等現在海軍當差之候補道員馬復恆著李鴻章飭令來京交吏部帶領引見○以德陞阿爲金州副都統○許振祿奏前兼署河臣裕寬援案奏請撥發甲午年運河另案工需銀六萬兩仰蒙 恩准轉行河道驛欽遵辦理去後嗣據山東運河道書安陸續詳請估價辦理在案茲據護理運河道運河同知龔秉輝查明請奏前來臣查運驛屬濟寧州汛運河東岸通心橋南裏石堤工一段長九十六丈歷經重空漕船往來施犁打樑震動損傷格木朽腐斷橋石塊酥碎坍卸土戩殘缺卑矮亟應照舊澈底拆修以利漕運而衛民居其估需例幫二價銀四千八百五十兩四錢六分四釐又該驛屬汶上縣汛汶河西岸何家滾水石壩一座長五十八丈歷經伏秋汛內汶源暴漲急溜奔騰石塊衝掀斷折疊陷坍倒格木朽腐亟應照舊拆修以資分洩漲水保堤橋運共估需例幫二價銀一萬六百四十一兩九錢五分九釐溯河驛屬滕縣二汛運河東岸滕字土工七號十二號字土工一二四等號堤工均經伏秋汛漲衝刷淘致將各該工衝脫漫

口亟應修做埝工免誤運行計工五段共長五百五丈共估工料土方銀六千一百六十八兩四錢二分
又該廳屬滕嶧二汛運河西岸滕字石工一號十二號及嶧字石工十號十一號均坐當迎溜犯風之處
緣經伏秋大汛湖河並漲撞擊抽掣致將各坦坡衝刷坍塌段陷疊應照舊添拋以資抵禦計工四段
共長七百五十三丈共估例幫二價銀五千七百三十七兩七錢六分九釐補河廳屬莊平海東陽穀等
汛堤工歷經大汛黃汶並漲溜浪冲刷殘缺卑薄並多坑塘擇要幫培高厚共估土方銀一萬三千五百
二十四兩二錢四分九釐上河廳屬聊堂二汛堤工經伏秋汛漲黃水溜注急溜衝擊以致各工坍塌殘
缺亟應加高培厚連填坑塘共估土方銀八千五百七十九兩一錢八分六釐下河廳屬夏津等汛渡口
驛等處埝壩緣經汛水漲發撞擊掣拽淘塌料衝坍塌料折修完整共估工料銀三千一百二十八兩八錢
七分四釐泉河廳屬東平州汛戴字四號內碎石護堤歷被汶水盛漲水漫殆盡照堤頂風浪衝擊致將
碎石坍塌沈沒亟應擇要拆砌完整以資護禦共估例幫二價銀二千五百七十七兩三錢三釐又抽河
廳屬黃河水站船價水手飯食標桿旗幟用銀一千五十一兩五錢三分二釐連加捕三廳拍撈淤淺等
項用銀三千九百四十九兩六錢以上統共用銀六萬二百九兩三錢五分六釐較原請六萬兩之數尚
不敷銀二百九兩三錢五分六釐已由道廳攤捐彌補理合聲明等情臣覆核無異下部知之○乙卯諭

軍機大臣等有人奏候選知府雙綸陰險貪鄙以丁憂人員充當定安營務處差使並未回旗守制凡更換營官挑補兵丁均有納賄情事等語著裕祿按照所參各節確切查明據實覆奏不得因定安任用之人稍涉徇隱原摺著摘鈔給與閱看將此諭令知之○諭楊昌濬奏回郭郡王病故等語庫車回郭郡王阿密珙由京回牧行抵蘭州因病身故殊堪憫惻所有該郡王借支俸銀一千兩著加恩免其扣還靈柩回旗時並著沿途地方官妥爲照料應與之爾該衙門照例辦理○諭吳大澂奏湘軍虎字營哨官都司石雲峯經過靜海縣地方強索驛站馬匹兇毆傷人請將該都司嚴辦並自請議處等語都司石雲峯著卽行革職驅逐回籍並不准投効各路軍營以示懲儆吳大澂自請議處之處著加恩寬免嗣後各路軍營倘再有騷擾地方情事無論官弁勇丁卽著照軍法從事以肅軍律○諭前因已革總兵衛汝貴統帶盛軍臨敵退縮以致全軍潰敗並有剋扣餉需縱令兵勇沿途搶掠情事降旨拿交刑部治罪茲據刑部奏衛汝貴現已解送到部請旨辦理等語卽著刑部嚴行審訊按律定擬具奏○以翁曾桂爲江西按察使○鹿傳霖奏於光緒二十年十月初四日欽奉電寄諭旨現在倭寇擾及秦境畿疆喫緊兵力尙形不足著鹿傳霖挑選勁旅數千擬令得力將領統帶入衛切勿延緩欽此當經臣先後奏明調撥精壯馬隊五百人分爲兩營步隊二千人分爲四營選派留陝甘補用總兵記名提督馬心勝先行統帶北上

茲於十月二十八日將馬步大營調集省城配齊鎗礮軍裝名曰陝西撫標永興軍統帶官馬心勝呈報擇於十一月初一日整隊啟程分作三起逐日換次前進迅速北上聽候調遣查陝省駐防馬步各軍歷經改營爲旗長夫伙勇亦均裁撤淨盡所需餉項均照節年裁減章程支發現在奏調入衛自應添募成營以便戰征調遣其長夫伙勇亦應添募以供長途跋涉及平日炊爨之用一切餉項均應按照征兵章程撥給月餉俾資飽騰而期得力當與善後局司道籌商仿照楚軍章程馬隊以二百五十人爲一營步隊以五百人爲一營并添募長夫伙勇分別支給口分均自光緒二十年十一月初一日爲始一律按照新章支發隨帶三箇月餉項以便開支而免乏食至該營以後餉項軍火如何接濟之處應俟到京後奏撥何處再行籌議辦理茲據善後局司道開具營制餉章清單詳請奏咨前來臣覆查無異至續行調募馬隊大營業已遴委得力將官分額調募一俟齊集來省操練嫺熟後再飭星馳北上以及本省防軍妥籌添募駐紮兼顧地方容俟籌辦就緒另行具奏下部知之○丙辰諭前因旅順失守先後降旨將提督黃仕林趙懷業衛汝成革職拿交刑部治罪並諭令李鴻章嚴拿速解茲據奏稱黃仕林於旅順失守後減水遇救輒卽南歸江西南昌縣原籍遣懷業衛汝成兩員均籍隸合肥至今仍無下落難保不潛行回籍請飭江西安徽各巡撫查拿等語著德馨福潤嚴飭各地方官嚴密查拿迅速解部毋任避匿○

諭本年順直各邑夏秋雨水過多災區甚廣業經賞發倉米提撥商捐等項藉資振撫惟念現距麥秋尙
連災民待賑方殷允宜再沛恩施俾資來年春撫卹著張之洞奎俊於江蘇海運卹征折色米石內提撥
出漕米十二萬石迅速核明折色數目將銀兩解交順直應用所有葉榮箇兒錢等項及剩價運費經剿
船食米石折價著一併核扣撥解李鴻章於前項銀兩解到卽卽按照被災州縣多寡以順天四成直隸
六成分撥並著督飭卽委各員核實散放不准稍有弊混用副朝廷軫念民艱至意該部知道○丁巳日
人取我蓋平○命侍衛成勳恩福馳赴長順軍營總候差委○李鴻章奏本年春間東河督臣許振祿奉
命查勘永定河形勢議治中洪仿照乾隆年間裴曰修辦法修復浚船自二十號每年須添經費銀二
萬兩因前辦部欸銀三十萬兩除建派水壩外尙存銀三萬二千數百餘兩就此開支造船銀一萬二千
餘兩其餘二萬兩作爲本年浚船經費自光緒二十一年起由部撥給浚船經費銀二萬兩會同臣奏奉
諭旨允准嗣接戶部來咨此項浚船經費今在藩運兩司庫提撥經臣檄藩運兩司每年各解銀一萬
兩撥解撥用本年該河工多且急不便停欸待船經河防局詳准將本年經費銀二萬兩辦理兩岸要工
又另僱民船試挖南上並下游淤灘在於造船欸內動用銀一千一百餘兩核計造船一欸僅存銀一萬
一千四百餘兩本屆汛防竣後卽應查照原奏排造浚船當令河防局體察情形悉心籌辦該局飭撥五

總查得漫船疏濬中槽使大溜不遠近岸固屬有益然必積年而後見效該河兩岸上下數百里帶段林立每遇伏秋大汛渾流湍悍異常上提下挫奇險遞生堤之存亡危於呼吸臨時搶險橋料備不應手堤埝立見潰決該總等再三審酌漫船尚可暫緩橋料預備宜豐僅恃原額並新增歲款萬不敷用現值海疆多故軍需浩繁來年未能多籌鉅款以應修防擬將每年漫船經費並原存造船銀兩添辦兩岸大汛搶險橋料洵於要防有裨粵由該局核議詳奏前來臣查永定河工險重需款繁鉅本屆辦理兩岸堤埝各工及大汛搶險除原額並新增歲款外飭由籌賑局添撥銀兩撒手檢辦始保安瀾此後一切修防歲款斷不敷用該河切近京師關繫重要不得不移緩就急妥慎籌防應請各該局屬所議暫將每年漫船經費銀二萬兩並原存造船銀一萬一千四百餘兩均撥作兩岸各汛搶險橋料之需雖該河工程之險埝段之多添此款項修守尚難裕如然多一分經費究多一分裨益臣當督飭該局認真籌辦務期工歸實在此不虛糜以仰副聖主慎重河工之至意下戶部知之○戊午諭軍機大臣等有人奏知縣貪婪不職請飭查辦一摺據稱江蘇南匯縣知縣汪以誠貪酷殃民於觀瀾書院公田改佃一案得受顧學源賄賂勒令張世榮退佃致釀事端並有搗妓飲酒誣良為盜等情所奏如果屬實亟應嚴行參辦當查俊按照所參各節據實覆奏毋稍徇隱原摺鈔給閱看將此諭令知之○諭給事中洪良品奏各省稅

盤局委用各員其承管姓名應先報部立案暨無職之人捐納官職者須令赴部驗看方許派委等語
該部議奏○諭御史敬祐奏戶部三庫差缺近來有由緞疋顏料兩庫實緣調補銀庫及報滿遇延等弊
請旨嚴禁等語戶部銀庫司員向由各衙門保送帶領引見候旨補用若率以緞疋顏料兩庫司員請調
易欺實緣之漸嗣後著管庫大臣遵照定章辦理不得以緞疋顏料兩庫人員調補銀庫著於差滿時先
期咨取人員以備帶領引見不得任意延宕久稽時日再內務府銀庫司員差滿時著該堂官卽行帶領
引見奏請更換不准率請留任以符定制而杜弊端○予安徽舒城縣烈婦李武氏旌表○己未諭前因
黑龍江糧回太監董雙福等沿途滋擾解差官驛騎校巴彥珠拉等不能彈壓降旨交部嚴處茲據兵部
遵議覆奏騎騎校巴彥珠拉等驛尉王慶均著照部議卽行革職以示懲儆餘依議太監董雙福等現在
曾否解到著內務府查明先行覆奏如尙未到京仍著咨行經過省分飭令迅速解送不准逗遛○諭張
之洞電奏署蘇松鎮水任九江鎮總兵朱淮霖因病請假回省調理跡近規避請以副將降補等語現在
軍務緊要各將士正當及時自効該總兵率行請假實屬意存規避朱淮霖著以副將降補以示懲儆○
以望肅爲內閣學士○增祺奏呼蘭巴彥蘇蘇綏化等處東界深山密林數百里南隔松花一江與三姓
山場相通竊盜依爲淵藪從前分紮鎮邊軍馬隊五營尙不時乘隙出搶本年七月間將軍依克唐阿抽

帶馬步各營赴奉天援剿只剩馬步隊各三百人奸究之徒卽乘虛紛起營經奴才一面撥隊前往一面飛飭嚴緝並示諭鄉民各練會勇互相保衛以輔兵力之不足旋據馬隊翼長記名副都統管依崇阿呈報七月三十日探得綏化屬屬津河東北有馬步賊匪四十餘人在賴大福家盤踞經督隊官成祥帶兵十六名趨往剿捕該匪等恃院牆爲固向外鎗礮連施官兵亦加鎗攻撲相持兩時之久當將其紅巾賊首一名先行擊斃並直前闖入院內力斫悍賊四人該匪見勢不支遂拆後牆逃竄適該處聯莊會勇十餘人亦馳至幫同追殺七名餘匪向高粱地內竄匿時天已昏黑隨卽撤隊查點受傷兵一名得獲賊馬八匹搜鎗洋礮十二桿次日仍各分出尋緝八月初四日緞山包河西復有另股賊匪四十餘人向各屯搶擄賊匪民高鴻根等報經該處駐紮步隊營官春陞派令哨官堆隆阿帶兵追至楊占一家與會勇合力攻擊該匪拚死抗拒我軍亦奮勇爬牆進院交手撕殺斃賊四名生擒三名賊勢窮蹙急乘黑奪門竄出哨官堆隆阿正在督兵追擊忽被賊鎗打透胸膛登時陣亡什長八十一等亦各被鎗子打傷該匪隨後乘隙分逃共獲鞍馬九匹鎗礮五桿嗣於十七日馬隊營官勝全深悉餘黨尙在轉心湖放牛窩堡當卽督帶隊兵會勇馳往圍攻半時將其著名賊匪羅發化字才字長江等及夥匪悉數殲擒得獲鞍馬六匹洋鎗洋礮五桿二十日哨官烏爾滾布亦督隊巡至小藕根河地方遇賊二十餘名該匪卽列隊

開鎗勢甚猛悍時已將日落官兵奮擁前攻斃賊七名生擒王派振等四十名該匪潰敗奔向山林潛逸
追尋無獲始行收隊獲其鞍馬九匹大洋礮鎗十四桿及布疋衣服多件又二十一日大林家店突有
賊匪二十餘人劫掠商民該處有馬棚六名經督隊官納恩沙布帶同追至二龍山賊匪欺我兵少返回
拒敵該督隊官令兵下馬用鎗連環發放立時傷斃賊五名忽皆奔馳而去復跟數里天黑收隊打落賊
馬三匹併煙土火藥鉛丸等項賊物隨時傳主給領後於北河灣黑山津河等處續行緝獲逃匪薛振凍
等十五犯皆係積年巨匪訊明後均隨時稟經批示照章就地正法梟示以昭炯戒所獲馬匹分別給予
充賞器械存官地方現已安靜各等情呈報前來查該處地方遼闊最易藏奸流匪亡命之徒所在皆有
且近年各種教匪亦潛相勾結故時須重兵彈壓今該匪等於各隊甫經抽調之際膽敢乘虛糾股肆起
與官兵列隊抗敵實與叛逆無異若非隨時奮力撲滅一任鴟張蔓延剿辦卽形費手現在地方安堵如
常所有在事出力員弁均能以少擊衆奮勉異常不無微勞足錄合無仰懇 天恩可否擇其尤爲出力
者俟年終彙案請獎以示激勵其陣亡哨官花翎卽補協領披甲堆隆阿奮勇捐軀可否 飭部從優議
卹均出自 逾格鴻施特 旨如所請行○庚申諭軍機大臣等昨因倭寇欲犯威海已諭李鴻章等飛
飭嚴防第念海軍戰艦數已無多豈可稍有疏失若遇敵船逼近株守口內轉致進退不得自由應如何

設法調度相機迎擊以免坐困著李鴻章悉心籌酌飭令海軍諸將妥慎辦理並先行覆奏○諭宋慶電奏蓋平於十五日失守請將總兵章高元徐邦道嚴議並自請處分等語章高元駐防蓋平於賊犯該縣時接仗未能得力徐邦道赴援遲緩均屬咎無可辭山東登州鎮總兵章高元直隸正定鎮總兵徐邦道均著交部嚴加議處宋慶調度無方著一併交部議處○諭御史陳其璋奏各省未經驗看人員請停差委等語未經分發到省人員本不准派委差使若如所奏各省人員多有未經赴部驗看先行到省派委差使實屬有違定制嗣後凡未經驗看引見人員著各督撫破除情面一概不准差委以杜取巧○以宋朝儒爲江西九江鎮總兵○辛酉諭軍機大臣等張之洞電奏擬募勇大營駐岳州訓練以備征調並請飭湖南於部章捐借項下籌措餉需如有不敷由戶部撥給均著照所請戶部知道○諭前因畿輔大兵雪集諭令各路統兵大員約束兵丁嚴禁騷擾近聞直隸山東一帶師行所至仍不免擾害地方民間畏懼兵差至有拋棄車馬棄間竄逃情事若不嚴加申禁何以肅軍律而恤民艱著各路統兵大臣嚴飭各將領懷遵前旨申明紀律不准絲毫累民所部兵勇倘敢恃眾逞強卽按軍法從事毋許徇縱並著直隸總督山東巡撫於大兵經過各州縣一切差費津貼以蘇民困至沿途應設卡鋪仍著責令地方營汛派撥捕役認真巡邏毋稍疎懈○諭御史管廷獻奏兵民艱食宜設法購買平糶一摺據稱近畿一帶連年

被水糧價騰湧惟有向山東河南購買雜糧由衛河運至天津山海關一帶平糶等語著體察情形或道
員購買或招商購買並將沿河各關糧石稅釐一概豁免源源挽運以濟要需○以承德爲綏遠城將軍
○召沈晉祥來京○壬戌諭軍機大臣等前經降旨將軍員豐陞阿嚴桂林拿交刑部治罪尚未據裕祿
奏報起解著該將軍卽行派員押解來京不得任其逗遛仍先行電覆○以曾鈺爲甘肅布政使李有榮
爲陝西按察使○予蓋平陣亡提督楊壽山副將李仁黨等祭葬世職○托佛歡奏奴才近聞順天府所
屬寶坻良鄉縣知縣范鳳福與該縣游姓廩生狼狽爲奸吞蝕八村賑款衆民呈訴伊卽威以刑杖使民
敢怒而不敢言忍心害理莫此爲甚又復重用衙中抽役著名之匪徒焦永卽縣第紳號西霸天者假之
權柄焦永又引伊夥妝像王五等倚仗官勢越境擾民聲言現在過兵各路車馬駱駝俱交官應用其實
不過向民逼錢每車馬要制錢十串駱駝要制錢一串如無錢者不但車馬駱駝留下並且連人鎖掛不
放以至各處騷動民不聊生該知縣之弟閒遊偶見有姿色婦女便欲與姦宿該婦不允遂捏言其爲惡
無狀該知縣卽查拿到案不問黑白用竹掠帚亂打後復將鞋剝去以燒紅之磚令該婦站立極種殘
暴實負我 皇上愛民恤刑之至意若不痛加懲治深恐釀成巨患 上諭軍機大臣等有人奏良鄉縣
知縣范鳳福與廩生游姓吞蝕賑款重用抽役焦永借過兵爲名索迫車馬駱駝等錢聽信其弟捏言妄

拿婦女請飭查辦等語著孫家鼐陳彝按照原參各節確切查明據實具奏○癸亥諭御史齊蘭奏前任粵海關監督聯捷任滿年餘並未來京顯有交代未清情弊德生現已任滿俟新任監督玉璠到任應即清理交代回京等語著李瀚章嚴催聯捷德生趕緊將交代清理迅速回京倘再任意遲延即行據實參奏○命四川提督宋慶湖南巡撫吳大澂幫辦劉坤一軍務○刑部奏光緒二十年十二月十一日准盛京將軍裕祿派撥委員押解已革總兵衛汝貴咨送到部當經收禁於十三日具奏併以可否 簡派大臣會審抑或於 臣部按例治罪之處請 旨辦理奉 上諭已革總兵衛汝貴統帶盛軍臨敵退縮以致全軍潰敗並有剋扣軍餉縱令兵勇沿途搶掠情事降旨交刑部治罪茲據刑部奏稱衛汝貴現已解送到部請旨辦理等語革員衛汝貴應得罪名著刑部嚴行審訊按律定擬具奏欽此查已革寬夏鎮總兵衛汝貴於十月初五日奉 旨革職拿問交刑部治罪當由 臣部恭錄 諭旨移知 盛京直隸等處行令迅將衛汝貴押送前來嗣經節次催復於十一月十二日奉 旨嚴催著沿途查明該革員行抵何處迅將押解來京毋任逗遛等因旋復經人奏參奉 旨交幫辦北洋軍務四川提督宋慶查明覆奏於十一月二十一日奉 上諭已革總兵衛汝貴平時待兵寡恩此次赴朝鮮擾剿不能約束弁勇縱令到處騷擾以致民人怨謗種種罪狀實爲僨事之尤等因欽此現交 臣部嚴行審訊 等以案情重大

遵卽遴派司員飭令從嚴訊鞫據衛汝貴供稱係安徽合肥縣人統帶盛軍多年向在小站屯紮本年六月間奉調赴朝鮮援剿共帶步隊十二營前往馬隊五營陸續進發當率十營駐紮平壤留兩營與鹽陞阿所帶各營同駐安州該革員與馬玉崑同在平壤城外西南地方駐紮扼守大同江沿左寶貴駐守北門外八月十二三日會與倭人接戰屢獲勝仗十四五日倭人渡江四路來攻伊等兵力不支左寶貴旋經陣亡又因兵餉缺乏子藥不敷於十六日晚經總統葉志超傳令齊退到安州亦未紮住直退至義州復過鴨綠江始行停留至淮軍餉章坐糧每年止發九箇月行糧始行補足十二箇月伊奉調後共領餉銀二十四萬兩交卸時除開放馬步隊口糧購辦馬車輜途中船價各項外尙餘銀米約八萬兩移交後任並無剋扣在平壤退兵每人所餘子藥三四十箇不等各等語臣等查衛汝貴身爲盛軍統帥其奉派率師援剿駐守平壤責任綦重如果所帶兵勇平時訓練有方何至臨敵潰退據稱十二三日倭人兩次撲犯均被該革員獨力擊退迨十四日倭人分兵四出轉致不能抵禦竊恐無此情理卽謂葉志超係屬總統伊係奉令退軍猶不思該革員所帶步隊已足十二營兵力不爲不厚其時尙有馬玉崑左寶貴各營分守要隘儘可聯絡聲力保堅城就令小有挫衄亦何至奔北至數百里之遙且安州尙有馬步數營亦足以供策應果能奮勇爭先督兵力戰豈葉志超所能率陣況與宋慶查奏情形迥不相符所供

與倭人接戰屢獲勝仗顯係餉詞捏抵如謂兵餉缺乏子藥不敷該革員奏調後所帶餉銀二十四萬兩亦不爲不多據稱交卸時尙餘銀米約八萬兩在平壤退兵時每兵所剩子藥約三四十箇不等且與倭人相持不過數日何至缺乏如此所供尤不足信至尅扣兵餉及縱兵擄掠各節雖均訊無證據惟宋慶原奏內稱衛汝貴平時待兵寡恩赴韓援剿後路押運車輛弁勇既無約束未免沿途騷擾以致聲名狼籍其在韓境滋擾尤甚韓民怨謗實深則該革員平日之尅減軍糧漫無約束以致兵丁沿途騷擾自不得謂非實在確據反覆究詰該革員亦無從置辯而仍不肯認咎等竊維軍無紀律卽爲潰敗之因待兵寡恩斷難資以用命該革員平時於軍務既漫不經心臨事又復節節退縮反委咎於葉志超冀卸重罪且揆其私意難保非因葉志超尙未到案希圖與之質對藉以延宕時日居心尤不可問既經欽奉諭旨交臣部按律治罪未便任令再事狡展應卽擬結查律載領兵官已承調遣逗遛觀望不依期進兵策應因而失誤軍機者斬監候等語此案已革總兵衛汝貴統帶盛軍歷有年所乃平日刻薄寡恩毫無約束奉調往援平壤與馬玉崑等分駐各城外併不能互相掎角及左寶貴被倭人攻擊又不能親爲救援以致左寶貴陣亡平壤亦棄置不顧相率奔逃退營至數百餘里貽誤大局厥罪實無可逭按失誤軍機與失陷城寨二罪均應擬斬自應從一科斷已革甯夏鎮總兵衛汝貴合依領兵官已承調遣逗遛觀

望不依期進兵策應因而失誤軍機者斬律擬斬監候該革員尙有剋扣軍餉縱兵搶掠情事誠如聖
諭種和罪狀實爲僨事之尤若不從嚴懲辦殊不足以伸國法而警效尤應如何加重之處恭候 欽
定 上諭刑部奏遵旨定擬革員衛汝貴罪名並聲明該革員罪狀較重請旨遵行一摺已革總兵衛汝
貴平日待兵刻薄寡恩毫無約束此次統帶盛軍臨敵節節退縮貽誤大局並有剋扣軍餉縱兵搶掠情
事罪狀甚重若不從嚴懲辦何以肅軍律而儆效尤衛汝貴著依律論斬卽行處決派刑部尙書薛允升
監視行刑○甲子諭軍機大臣等譚鍾麟奏遵查閩海關稅務情形一摺該關積弊甚深亟應認真整頓
以期上裨國課下恤商艱著俟慶裕到任後譚鍾麟與之會商妥籌將各項弊竇實力革除擬定章程奏
明辦理○諭順天府奏順屬冬撫完竣接辦春撫情形開單呈覽並懇賞發春撫米石一摺本年順屬災
歉來歲青黃不接爲日方長春撫之需自應寬爲籌備加恩著再賞給京倉米三萬石俾資接濟該衙門
知道單併發○諭兵部奏遵旨嚴議處分一摺此次蓋平被陷山東登州鎮總兵章高元接仗未能得力
匪隸正定鎮總兵徐邦道赴援遲緩該部分別議以革職均屬咎有應得惟念該總兵等迭次遇賊交
戰尙能奮勇著加恩改爲革職留任仍責令帶罪圖功以觀後效朱慶著照部議降二級留任○雲南巡
撫譚鈞培卒子祭葬賞其子候選道譚啟宇以道員卽選○乙丑諭軍機大臣等督辦軍務王大臣奏營

勇拾銀滋事請將未能彈壓之營哨統轄各官分別懲處等語遊擊銜留甘補用都司吳連城山東候補參將李連陞藍翎守備符有才均著卽行革職甘肅提督李培榮著交部議處餘依議○諭理藩院奏蒙古王公等捐輸軍需銀兩開單請獎一摺該王公等情殷報効洵屬急公三音諾彥扎薩克親王特固斯瓦齊爾車臣漢扎薩克郡王多爾濟帕拉穆均著賞用紫綬扎薩克圖漢貝子銜扎薩克輔國公達什拉布坦著再賞給貝子銜一輩三音諾彥扎薩克輔國公德里克多爾濟扎薩克圖漢貝子銜扎薩克頭等台吉呢朗瓦爾均著挑在御前行走○丙寅諭內務府奏遵旨擬陳六庫司員宜定限制一摺內務府定例銀茶二庫司員三年期滿轉出者扣足十年方准再轉皮磁緞衣四庫轉出者不論年分遇缺卽准轉補卽著仍照舊章辦理惟銀庫司員期滿更換不得藉口因地擇人率將五庫司員奏請調補以杜流弊○諭理藩院奏扎薩克台吉捐輸軍需請有獎勵一摺貝子銜扎薩克頭等台吉那遜布彥濟爾噶勒報効軍需銀五千兩洵屬急公著照章賞給雙眼花翎並加恩賞用紫綬以示嘉獎○調移著爲雲南巡撫以德壽爲貴州巡撫○譚鈞培奏雲南孟連土司原屬順寧府管轄相距十七站之遙平日聲教鮮通諸多不便且與孟良接壤時有交涉事件該應覓見所未見鮮不因應乖方而文報往還又非月餘不達事機變換萬難遙測一有貽誤關繫非輕是該處緊鄰外域揆之今昔情形實有未可一概論者此時若再

拘泥舊制於邊務甚非所宜查有新闢之鎮邊同知距該處僅只三站呼應最為便捷自不若將孟連土司就近改隸鎮邊屬一切均易照料至上下孟允土目原隸孟連管轄現在孟連既擬改隸鎮邊屬所有上下孟允亦應飭由該鎮督孟連妥為安置俾其有所依倚始終為我藩籬據護雲南迤南道劉春霖稟經督臣與臣批飭督後局司道會同藩臬兩司議詳請奏明立案等情督臣王文韶未及核辦卸事移交前來臣覆查無異除咨部查照外理合恭摺具奏伏乞 皇上聖鑒敕部立案施行下部知之○丁卯日人犯山東榮城縣據之進逼威海衛○諭御史溥松奏餉賑廢弛亟宜整頓一摺據稱鎮江蘇州學習印務參領雙林居心貪鄙任意把持每月散放該旗兵餉按名剋扣遇有該旗領米事件復侵漁中飽前因侵吞米價案內撤去印務參領旋經續後職近更肆無忌憚又儲蓄倉監督曹英富新倉監督王廷本人品卑下聲名平常每遇散放米石從中勒索近於順屬應領賑米藉端訛詐並有辱罵順天委員索銀情事請旨查辦各等語著鎮江蘇州都統倉場侍郎按照所參各節確切查明據實覆奏毋稍徇隱○調王廩為安徽布政使以倉廩三為湖南按察使○諭御史溥松奏順天大宛兩縣向有實籍搶替等弊雖經歷任學臣嚴行禁止弊端歷久難防並聞廣東等省並有假手吏胥賄託實籍或賈充該學廩增附生之名倩人入場中式後改歸原籍情事請飭查辦等語著禮部查明具奏○己巳諭已革道員與

照得前因旗順船塢失陷避至煙臺降旨拿交刑部治罪茲據刑部奏稱該革員現已解送到部請旨辦理等語獨照得該革員即著刑部嚴行審訊按律定擬具奏○諭戶部奏遵議解清甘餉各員應給獎敘請旨辦理一摺著吏部議奏單併發○前巴里坤總兵何瑄卒飭開復處分事蹟交國史館立傳准於巴里坤建祠○庚午 上諭 中正殿拈香○命雲貴總督王文韶充辦北洋事務大臣○壬申 上諭 太廟行禮○諭軍機大臣等依克唐阿十九日電奏已悉榮和所帶李樹等自帶土著獵戶二千人投營効力等語如察看此項義民果能得力即准其隨營調遣且須按名查明來歷以防奸宄洩跡滋患○是年統計出口貨直銀一萬二千八百四十萬五千五百二十二兩進口貨直銀一萬六千二百一十萬二千九百一十一兩相抵虧三千三百九十九萬八千三百八十九兩凡徵貨稅銀二千二百五十二萬三千六百五兩